

## Siunnersuummut nassuiaatit

### Nassuiaatit nalinginnaasut

#### 1. Aallaqqaasiut

##### 1.1. Siunnersuut pillugu pingaarnertigut tunuliaqutaasut

Inuiaqatigiinni naligiinnerup annertusinissaa, nunami immikkoortuni tamani ineriartornermik pilersitsinissaq Naalakkersuisut kissaatigaat – minnerunngitsumillu ilaqutariit ataasiakkaat pillugit toqqissisimanermik tamanullu inissaqartitsisumik pilersitsinissaq. Inissiamik pisariaqartitsiffiusuni inissianik sanaartornerup ilaqutariit ataasiakkaat toqqissisimasumik atugaqarnissaat qulakkeerpaa, sanaartornermik ingerlataqalersitsilluni aamma inoqutigiit sumiiffimmi inuunermik ingerlatsisinnaaneranunut pitsaasumik tunngavissiiisuulluni.

Nammineq illuliornermik aamma illumik sanaqataaffiusumik aaqqissuussineq 1953-imili periarfissaasimavoq. Tamanna aaqqissuussineq pitsaasuvoq nunaqarfinni illoqarfinnilu mikinerusuni innuttaasut inissianik pilersornissaannut periarfissiilluni aamma innuttaasut inissiamik attartortakkamik isumalluuteqarunnaarsillugit. Inissiamik sanaqataaffiususamik tunineqarnissaq piumassuseqarnermik pisariaqartitsivoq – inissiamik sanaartornermi atugassanik pilersuisoqartussaammatt, sanaqataasorlu taassumalu ilaqutai sanasut ilitsersuisutullu ikiorti peqatigalugit illup sanaartorneqarnissaanut suliaqarnissamik peqataanissamillu sillimariissallutik.

Inoqutigiit nammineq inissiamik pilersornissamut piumassuseqaraluarpataluunniit, nunaqarfinni illoqarfinnilu mikisuni illuliornissamut aningaasalersuutissarsiniarneq ajornakusoorsinnaavoq, pingaartumik ilaqutariit isertitakitsuuppata. Illumik sanaqataaffiususamik aaqqissuussineq nunaqarfinni illoqarfinnilu mikinerusuni innuttaasunut illumik sanaqataaffiususamut ileqqaarnissamut imaluunniit taarsigassarsinissamut periarfissaqartunut, kisiannili aningaaserivikkut taarsigassarsinikkut imaluunniit illuummik qularnaveeqqusiilluni taarsigassarsisitsisarfikkut aningaasalersuinerup sinneranut pissarsisinnaanngitsunut saaffiginnippoq.

Illumut sanaqataaffiusumut taarsigassarsinissaq pillugu Inatsisartut inatsisissaattut siunnersuut illoqarfinni inissianik aningaasalersuinissamik aaqqissuussinernut piginneqatigiillunilu inissianut periarfissaavoq allaasoq. Illumut sanaqataaffiusumut nammineq akiliutissat naatsorsornerini aaqqissuussinernut taakkununnga qanoq annertutigisumik taarsigassarsisoqarsinnaanerani immikkoortitsisoqarpoq. Taamaattumik illumut sanaqataaffiususamut nammineq aningaasaliissutit naatsorsorneri siusinnerusukkut illumik sanaqataanermi aaqqissuussinernut naleqqiullugu malunnaatilimmik allanngortinneqarput.

Illumut sanaqataaffiusumut taarsigassarsinissaq pillugu Inatsisartut inatsisissaattut siunnersuutip 1. januar 2019-ip kingorna kommunalbestyrelsip taarsigassarsisitsinera eqqarsaatigalugu inissialiornermut, illunut ataatsimoorussanut, illuliassanut il.il. tapersiissuteqartarnej pillugu Inatsisartut peqqussutaat nr. 11, 19. november 2007-imeersumi illunik sanaqataaneq pillugu kapitali 5 taarserpaa. Naalakkersuisut kingusinnerusukkut inissialiornermut, illunut ataatsimoorussanut, illuliassanut il.il. tapersiissuteqartarnej pillugu Inatsisartut peqqussutaat nr. 11, 19. november 2007-imeersumi aalajangersakkat sinnerinut nutaamik inatsisissatut siunnersuummik saqqummiussinissaq pilersaarutigivaat.

Aaqqissuussaanermik iluarsaaqqinnerup naammassineqarnerata kingorna suliassanik kommuninut suliassanngortitsinermi Naalakkersuisut pingaarnersiunerinut atasumik ataatsimoortumik tapiissutit pillugit isumaqatigiissummi isumaqatigiissutigineqarpoq 2017-imut Aningaasanut inatsimmi konto pingarneq 87.72.22 "Nunaqarfinni isorliunerusunilu inissialiortiternermut pilersaarut" 1. januar 2017-imit sunniuteqartumik kommuninut ataasiakkaanut tunniunneqassasut.

AIS2017-ip pingajussaaneernejarnerani konto pingarneq 20.05.20 "Kommuninut ataatsimoortumik tapiissutinut" aningaasaliissutit taamaattumik 2017-imi 25,3 mio. kr.-inik aamma 2018-imiit 26,5 mio. kr.-inik qaffanneqarput. Aningaasaliissutit qaffanneri konto pingarneq 87.72.22 "Nunaqarfinnut isorliunerusunullu inissialiornermi suliassanit aningaasaliissutinit" nuussinernut tungasuuvoq. Aningaasat kommunini illuliassanut, illunut arlalinnik ingerlatsiffiusunut imaluunniit illumik sanaqataanernut kommuninit atorneqassapput. Aningaasat kommunit akornanni agguarnejarneri tabellimit ataaniittumit takuneqarsinnaapput. Agguaassineq pivoq aningaasat 50 %-ii assigiimmik kommuninut ataasiakkaanut tamanut 1/5-mik agguarnejarlutik. Sinneri 50 procentit kommunini ataasiakkaani 700-inik ikinnerusunik innuttaqartut sumiiffiit aallaavigalugit agguaassinermi najoqqutaq aallaavigalugu kommunit akornanni agguarnejarput.

Agguaassineq tabellimi tulluuttumi takuneqarsinnaavoq:

Aningaasaliissutit	M 2018
(1.000 kr.)	26.752
Assigiimmik 50 %	13.376
Naleqqiussineq 50 %	13.376
Kujalleq	4.107
Sermersooq	5.066
Qeqqata	4.546
Avannaata	8.361
Qeqertalik	4.672
<b>Katillugit</b>	<b>26.752</b>

Kommuninut, Nunaqarfinnut, Isorliunerusunut, Attaveqaqatigiinnermut Ineqarnermullu Naalakkersuisoqarfik 31. december 2016 tikillugu inissiatigut suliaqarnermut aningaasaliissutinik aqutsisuusimavoq, tassunga ilanngullugit kommunini illuliassat illullu arlalinnik ingerlatsiffiusut pillugit sulianik suliarinninneq ikiunnerlu.

Illumik sanaqataanermik aaqqissuussinermik aqutsineq, tassunga ilanngullugit qinnuteqaatit, taarsigassarsiassanik sulianik suliarinninneq aamma aningaasaqarnikkut aqutsineq manna tikillugu INI A/S-imut suliaassanngortinneqarsimavoq. Ulloq 1. januar 2017-imiit inissiatigut suliaassanik aqutsineq suliaasanillu suliarinninneq kommuninit isumagineqarpoq, siusinnerusukkut INI A/S-imik isumaqatigiissut aamma atorunnaarluni. Taamaalilluni illumik sanaqataanermik aaqqissuussinermut tunngatillugu siumut sammisumik aqutsineq ikiuisarnerlu pillugit isumaqatigiissummut kommunit ataasiakkaat tamarmik isummertussaallutik, tassunga ilanngullugu taamatut manna tikillugu akiliuteqarluni allanut suliaassanngortitsineq ingerlaannassanersoq.

Nunaqarfiit isorliunerusullu pillugit inissianik suliaassat pillugit aningaasaliissutinik nuussineq ataatsimoortumik tapiissutit pillugit isumaqatigiissummi allaaserineqarpoq, isumaqatigiissummi immikkoortut allat allaaserineqartut assigalugit aningaasat taamaaqataanik nuunneqarsimallutik.

Ulloq 1. januar 2017-imi kommuninut tunniussinermi allaffissornermut aamma suliaassanik suliarinninnermut, pilersarusiornermut, sulisunut tiimimut tapiissutinut, illuliassanik pisinermut assartuinnermullu aningaasartuutit taamaalillutik suliniummut aningaasanit akilerneqassapput. Taakku saniatigut aningaasartuutit allat assersuutigalugu tulluursaanermi suliniutit, sanaartorfigissaaneq, kuuffinnut, ukioq kaajallallugu inermut atassusernerit il.il. kiisalu taakku saniatigut atortunik pilersuinnermut aningaasartuutit aamma suliniummut sinaakkusiussat avataanni akilerneqassallutik.

## *1.2. Nalinginnaasumik siunnersuutip imarisaa*

Kommunit ataasiakkaat ulloq 1. januar 2017-imi nunaqarfinni isorliunerusunilu illunik sanaqataaffiusunik pissarsinermut nutarterinermullu tapiissutitut allaffissornikkut akisussaaffik tiguaat. Illumik sanaqataaneq pillugu inatsisartut inatsisissaattut siunnersuutip nuussineq taanna aaqqissuuppaa.

Ukiuni kingullerni qinnuteqartut piukkunnaateqartut ikitsuararsuusimapput. Taamaattumik arlalitsigut oqilisaasoqarnera ilanngunneqarpoq, taamaalilluni innuttaasut amerlanerusut illumik sanaqataanissamut qinnuteqarsinnaallutik.

Aammattaaq siunnersuutigineqarpoq illumik sanaqataanermik aaqqissuussineq suli annerusumik nunaqarfinnut illoqarfinnullu mikinerusunut sammitinneqassasoq. Siunnersuutigineqarpoq siunissami taamaallaat nunaqarfinni kiisalu Kangaatsiami, Qaanaami aamma Ittoqqortoormiini illumik sanaqataaffiusunik nutaanik sanaartornissamut taarsigassarsisitsisoqarsinnaassasoq.

Siunnersuutigineqarpoq maannamut ukiunut 33-inut pinnagu ukiut 20-it ingerlaneranni illumik sanaqataaffiusumik sanaartornermi taarsigassarsiat appartikkiartorneqassasut. Peqatigisaanik siunnersuutigineqarpoq piffissami appartitsiartornermi nutarterinermut taarsigassarsinissamut imaluunniit tapiissutissanik pissarsisoqassanngitsoq. Ukiut 20-it kingorna illumik piginnittoq illuliortiternernut aningaasalersuineq pillugu Inatsisartut inatsisaat malillugu nutarterinermut taarsigassarsiassanik qinnuteqarsinnaassaaq.

Siunnersuutigineqarpoq illut sanaqataaffiusut utaqqiisaasumik peqannginnerup nalaani attar-tortinneqarsinnaassasut soorlu aamma siunnersuutigineqartoq piginnittut nikinnerini kommunalbestyrelsimiit taarsigassarsiat tiguneqarsinnaassasut.

Kiisalu siunnersuutigineqarluni illumik sanaqataaffiusumik nutaanik sanaartornissamut taarsigassarsinissamut aningaasatigut piumasaqaatit oqilisinneqassasut.

## **2. Siunnersuummi immikkoortut pingaarnerit**

Tulliuttumi siunnersuummi immikkoortut pingaarnerit misissorneqarput.

### *2.1 Atuuffia, tak. siunnersuummi § 1, imm. 2*

Utertillugit akilernerqartussaannngitsunik, taamaallaalli appartikkiartorneqartussanik taarsigassarsinissaq pilerinartorujussuummat nunaqarfinni illoqarfinnilu mikinerusuni illunik sanaqataaffiusunik nutaanik sanaartornissamut taarsigassarsisoqarsinnaassasoq siunnersuutigineqarpoq, sumiiffinni illuummik qularnaveequsiilluni taarsigassarsinikkut

aamma/imaluunniit aningaaserivimmi taarsigassarsinikkut inissianik nutaanik sanaartornernik innuttaasut aningaasalersuiffigisinnaanngisaanni aamma aningaasalersueriaatsinik allanik iluaquteqarsinnaanngisaanni, soorlu illuliortiternernut aningaasalersuineq pillugu Inatsisartut inatsisaat aamma piginneqatigiilluni inissiat pillugit Inatsisartut inatsisaat naapertorlugit taarsigassarsititsisarnerit.

Nunaqarfinni aamma Kangaatsiami, Qaanaami Ittoqqortoormiini illunik sanaqataaffiusunik nutaanik sanaartornermut taamaallaat taarsigassarsisitsisoqarsinnaassasoq siunnersuutigineqarpoq. Siunnersuutip kingunerisaanik Nanortalimmi, Narsami, Qaqortumi, Tasilami, Paamiuni, Nuummi, Maniitsumi, Sisimiuni, Aasianni, Qasigjanguani, Qeqertarsuarmi, Ilulissani, Ummannami aamma Upernavimmi illunik sanaqataaffiusunik nutaanik sanaartornermut taarsigassarsisitsisoqarsinnaajunnaassaaq.

Annerpaamik pisariaqartitsiffiusutut isigineqarsinnaasuni illunut sanaqataaffiusunut aningaa- sanik suli annerusumik salliutitsinermit siunnersuut peqataassaaq.

## *2.2 Sumiiffiit atorineqanngitsunik inissiaqarfiusut, tak. siunnersuummi § 4, imm. 2*

Illumik sanaqataaffiusumik sanaartornermut imaluunniit pissarsinermit kommunalbestyrelsip taarsigassarsisitsinera inissianik pisariaqartitsinerup aaqqineqarnissaanut iluaqutaa voq. Siunnersuutigineqarpoq pisortat inissiaateqarfiini attartortittakkani inoqanngereersuni imaluunniit illunik sanaqataaffiusuni imaluunniit nammineq illuliani inoqanngiffiusuni nunaqarfinni imaluunniit illoqarfinni illumik sanaqataaffiusunik nutaanik sanaartornermut taarsigassarsisitsisoqassanngitsoq.

## *2.3 Taarsigassarsiat akilersornissaannut piffissaq, tak. siunnersuummi § 9*

Illunut sanaqataaffiusunut taarsigassarsiat maannakkut aaqqissuusinermit ukiuni 33-*ini* ernia- lersorneqarnatillu akilersugassaanngillat taarsigassarsiallu ukiuni 33-*ini* assigiaartumik annikillartortinneqassallutik. Inissiat aaqqissuusinermit sukkanerusumik peersinniarlugit taamaalillunilu allaffissorneq annikillisinniarlugu siunnersuutigineqarpoq ernialersugaanngit- sunik akilersugassaanngitsumillu taarsigassarsiat siunissami ukiuni 20-*ni* assigijimmik appartikkiartorneqassasut.

Illut sanaqataaffiusut pillugit peqqussut kingullermik 2007-*imi* nutarterneqarpoq tassanilu siusinnerusooq assigalugu akiitsut ukiuni 33-*ini* appartikkiartorneqarnissaat aallaavigineqarluni. Iisimaneqarluarpoq taarsigassarsiat ukiut 33-*it* sinnerlugit sivirususeqartilugit inoqutigiippassuit taarsigassarsinermit piffissap naggataata tungaani nutarterinissamut pitsanngorsaannissamullu taarsigassarsinissamut atorfissaqartitsisartut. Taamaattumik siunnersuutigineqarpoq illumik sanaqataanermik aaqqissuusinermit nutaamik akiitsut ukiut 20-*t* ingerlaneranni appartikkiartorneqartassasut. Illu aaqqissuusinerup iluani

ukiut 33-it iluanni aqunneqassanngippat, kisiannili taamaallaat ukiut 20-t iluanni tamatuma allaffissorneq pisariinnerulersissavaa.

Illup sanaartorneqarnerata kingorna ukiut 20-t iluanni taarsigassarsiat appartinneqarpata nutarterinissamut taarsigassarsinissamut pisariaqartitsisoqassanngilaq. Siunnersuutigineqarpoq illumik sanaqataaffiusunik nutarterinermut tapiissutisinissamut taarsigassarsinissamullu periarfissaq illumik sanaqataanermik aaqqissuussinermut ilaajunnaassasoq. Ukiut 20-it kingorna illuutilik illuliortiternernut aningaasalersuineramik aaqqissuussineq malillugu nutarterinermut taarsigassarsinissamut qinnuteqarsinnaavoq.

#### *2.4 Nammineq akiliutissat naatsorsornerini isertitanut killiliussat, tak. siunnersuummi § 10*

Illumik sanaqataasut nammineq aningaasaliissutissaanik aalajangersaaneq maannakkut inatsisini inoqutigiit ukiumut isertitaasa akileraaruserneqartussat agguaqatigiissillugit 180.000 kr.-it aallaavigalugit isertitat apeqqutaatinneqarput. Tamatuma nammineq illuliorusuttunut siunnerfigineqartunut periarfissat killeqartippai, tassa inuit taakku nammineq akiliutissaminnik ileqqaagaqarnissamut sapernartitsimmata. Siunnersuutigineqarpoq illumik sanaqataasup nammineq akiligassai inoqutigiit ukiumut isertitaasa akileraaruserneqartussat agguaqatigiissillugit 300.000 kr.-it aallaavigalugit naatsorsorneqartassasut.

Peqqussummi atuuttumi inoqutigiit akileraaruserneqartussanik agguaqatigiissillugit 450.000 kr.-it sinnerlugit ukiumut isertitaqarpata illumik illulioqataaffiusumut taarsigassarsisitsisoqarsinnaanngilaq. Siunnersuutigineqarpoq killiliussaq taanna 600.000 kr.-inik qaffanneqarlunilu aalajangersarneqassasoq. Taamaalilluni inuit amerlanerusut nammineq akiliutissaminnut ileqqaarsinnaassasut nalilernerqarpoq.

Naatsorsuutigineqarpoq inoqutigiit 600.000 kr.-it sinnerlugit agguaqatigiissillugu akileraaruserneqartussanik ukiumut isertitaqartut aningaasalersueriaatsinik allanik atuisinnaassasut assersuutigalugulu aningaaserivinni inissianut taarsigassarsinnaasut allatigullu nammineq illumik sanaartornissamut imaluunniit illumik pisinissamut nammineq ileqqaarsinnaassasut.

Tamatuma peqatigisaanik siunnersuutigineqarpoq annerpaamik taarsigassarsiaasanik oqinnerusumik appartitsisoqassasoq, taamaalilluni inunnut 600.000 kr.-inik agguaqatigiissillugu akileraaruserneqartussanik ukiumut isertitaqartunut annerpaamik taarsigassarsiaasat aningaasartuutit taarsigassarsinissamut pisinnaatitaaffiusut 880.000 kr.-it missaaniittut 44 %-iinik annertussuseqassasut, taakkulu sanaartornermut aningaasartuutit 2 mio. koruuniusut taarsigassarsititsisinnaanermut missiliukkat tungavigalugit naatsorsorneqarput. Aningaasat taakku nunaqarfinni aamma Kangaatsiami, Qaanaami aamma Ittoqqortoormiini illuliortiternernut aningaasalersuineq pillugu Inatsisartut inatsisaat malillugu anguneqarsinnaasunut 880.000 kr.-inut annerpaamik taarsigassarsiaasinnaasunut naapertuupput.

Agguaqatigiissillugu akileraaruserneqartussanik ukiumut isertitani 600.000 kr-ini qinnuteqartup illumut sanaqataaffiusumut taarsigassarsinissaq imaluunniit inissiamik nalinginnaasumik sanaartornermut illuliortiternernut aningaasalersuineq pillugu Inatsisartut inatsisaat malillugu taarsigassarsissanerluni qinersisinnaavoq.

### *2.5 Pisortanit taarsigassarsiaqarfiusoq illu alla, tak. siunnersuummi § 14*

Illumik sanaqataaffiusumik sanaartornermut imaluunniit pissarsinermit kommunalbestyrelsip taarsigassarsisitsinera inissianik pisariaqartitsinermik aaqüinissamut iluaqutaa voq. Siunnersuutigineqarpoq inuit, inissiamik pigisaqareersut imaluunniit pisortanit taarsigassarsiaqarlutik inissiamik piginneqataareersut peqatigisaanik illumik sanaqataaffiusumi sanaartornermut imaluunniit pissarsinissamut taarsigassarsitinneqassanngitsut.

### *2.6 Najugaqartussaaneq attartornerlu, tak. siunnersuummi §§ 16-18*

Illunik sanaqataaffiusunik sananermut pissarsinermulluunniit taarsigassarsiaritit atugassarititaasut iluanaaruteqarfiusut atorlugit aammalu inissianik pisariaqartitsineq aaqüiviginarlugu tunniunneqartarput. Taamaattumik illut sanaqataaffiusut piginnittumut taassumalu inoqutaanut najugaqarfissatut atorneqarnissaat piumasarineqarpoq.

Kommunalbestyrelsi aningaasanik amerlasuunik inissianut taarsigassarsititsissappat, taarsigassarsisup illumi najugaqarnissaa pissussamisuginnassaaq. Najugaqartussaataitanermut pisortat illup inoqannginnissaanut aserfallannginnissaanullu, aammalu sumiiffimmi inunnik allanik inissaaleqillutik assersuutigalugu illumik sanaqataaffiusunik qinnuteqartannginnissaannik qulakkeeriniarnerat peqquataavoq. Taamaalilluni sumiiffinni ataasiakkaani inissianik pisariaqartitsineq sinnerlugu peqartoqalernissaa kingunerineqarsinnaammat.

INI A/S Namminersorlutik Oqartussat sinnerlugit inissialiortiternermut tapersiissuteqartarnermik aaqüissuussinermik aqutsisuusoq ilisimatitsivoq, illumik piginnittut inissiaatiminnik qimatsisarnerat ajornartorsiortitsisartoq. Illumik piginnittut nalunaaruteqaqqaaratik illumik qimatsisarmata, INI sanilinit allanilluunniit illumik inoqanngitsunik piserusuttunit saaffigineqartarpoq. 2016-imi nuna tamakkerlugu inissiat 160-it, boligstøttemit taarsigassarsillutik illuutilinnit qimanneqarsimasut INI-mi nalunaarsorsimapput. Sanaartornermut atortunut assersuutigalugu 1,2 mio. koruuninik taarsigassarsititsisoqarsimappat, ukualunnilu akileraareernikkut taarsigassarsiat affaanut appartinneqarsimappata (illumut ataatsimut 0,6 mio. koruunit) illuliortiternermut taarsigassarsiat 100 mio. koruuningajannik nalillit atorneqanngitsut matumani pineqartussaapput.

Sanaqateqarluni illulior tup illu pigisani taamaatissimanngippagu, najugaqartussaataitaneq nuttarsinnaanermut periarfissanik annikilliliisinnaavoq. Illup sanaqataaffiusup siunertaq naapertorlugu ator neqarnissaa pingaaruteqaraluartoq, najugaqartussaataitanerup sakkukillineqarnissaa, aammalu pisortat inissiaataannik attartortittakkamik allanut attartortitsisarnermut maleruagassat assigalugit illumik piginnittup inissiamik ukioq ataaseq tikillugu peqquteqarani immikkullu itumik pisoqarsimatillugu piffissami sivisunerusumi attartortitsisinnaanissaa siunnersuutigineqarpoq.

Aammattaaq siunnersuutigineqarpoq ilinniagaqarnermik, napparsimanermik, pineqaatissinneqarsimasut inissiisarfianni inissinneqarneq, inuiaqatigiinnik sullissineq imaluunniit piginnittup nammineq imaluunniit inoqutigiinni inuup utaqquisaasumik nuutsitaaneranik peqquteqartumik piffissami sivisunerusumi illumik sanaqataaffiusumik piginnittup najugaqarfiginngikkallarsinnaaneranik imaluunniit attartortitsinissamut akuersisoqarsinnaassasoq.

Attartornermut isumaqatigiissut Naalakkersuisuni attartornermut isumaqatigiissut akuerisaasumi suliarineqassaaq, allatigullu pisortat inissianik attartortittakkani piumasagaataat assigissallugit.

*2.7 Sillimmasiiner mut akiligassamut akiligassat akilinngitsuukkat, tak. siunnersuummi § 19, imm. 3.*

Inissialiornermut, illunut ataatsimoorussanut, illuliassanut il.il. tapersiissuteqartarneq pillugu Inatsisartut peqqussutaat nr. 11, 19. november 2007-imeersumi § 58 malillugu pisortani taarsigassarsiat appartinneqarsimatinnagit imaluunniit taarsigassarsiat akilerneqarsimatinnagit eqqartuussivikkut malersuinissaaq imaluunniit illup sanaqataaffiusup taarsigassarsianut qularnaveeqqusiunneqarnissaa pisinnaangilaq. Tamatuma sillimmasiiner mi akiliutissat akilerneqarsimanngitsut illup sanaqataaffiusup akiliussinikkut imaluunniit pinngitsaaliinikkut tunineqarneratigut sillimmasiisarfiit akiliisitsiniarsinnaanerat akornuserpaa.

Peqatigisaanik aningaasatigut ingerlataqarneq pillugu inatsisip Kalaallit Nunaannut atuutilersinnera pillugu peqqussut nr. 1252 15. december 2004-meersoq, kingullertigullu peqqussut nr. 1688 16. december 2015-imi allanngortinneqartumi § 60-ip malitsigisaanik sillimmasiisarfiit illup ikualattoornissaanut sillimmasiineq atorunnaarsissinnaangilaq, naak akiliinissamut kinguaattoortoqarsimagaluartoq.

Siunnersuutigineqarpoq illup ikualattoornissaanut sillimmasiiner mut akiliinissamik akiliinngitsoorneq illumi akiliisitsinikkut kingornalu pinngitsaaliinikkut tunisiner mi akilersinniarneqarsinnaassasoq.

*2.8 Illup sanaqataaffiusup tuniniarneqarnera, tak. siunnersuummi §§ 20 -22*



Illu sanaqataaffiusoq pillugu Inatsisartut peqqussutaat atuuttoq allaffissornikkut oqimaatsuvoq, tassa aaqqissuussinerup iluani tuniseqqinnernik teknikkikkut aningaasaqarnikkut nalilersuinernik aallaaveqarmat. Illumik teknikkikkut aningaasaqarnikkut nalilersuiartortitsilluni teknikerimik nunap ilaanut aallartitsineq annertuumik aningaasartuuteqarfiusarpoq. Assersuutigalugu 1,5 mio. kr.-inik akiitsoqartoq sanaqateqarluni illuliornermut aaqqissuussinerup iluani piginnittumut nutaamik illu sanaqataaffiusoq tunineqassappat aamma illut sanaqateqarluni illuliornermut aaqqissuussinerup avataaniittut assersuutigalugu 100.000 kr.-inik niuernerminaleqarpata tamanna aamma paasiuminaappoq.

Taamaattumik siunnersuut manna aaqqissuussinermik annertuumik pisariillisaasumik aallaaveqarpoq. Siullermik ukiut 33-inut taarsiullugu akiitsut ukiut 20-t iluanni annikillisarneqassapput illullu pisoqaanerisut nutarterinerup kingorna illumut sanaqataaffiusumut allangortinneqarsinnaanatik. Aappaattut piffissaq annikillisaaffiusoq sivitsorneqanngilaq, naak piginnittut nikikkaluartut.

Illut sanaqataaffiusut aaqqissuussinerup iluaniitinneqarnissaat namminermin anguniagaanngilaq. Taamaattumik piginnittut nikinnerini piginnittumi nutaami piumasagaatit allangortinnagit akiitsut nuunneqarsinnaanerisa akuerineqarnissaannut kommunalbestyrelsi periarfissaqarpoq. Taamaalilluni niuerfimmi nalimit qaffasinnerujussuarmik teknikkikkut aningasatigut nali pinnagu niuerfimmi nalinut illut tunineqarsinnaaneritut iluaqutaassaaq.

Illumi sanaqataaffiusumi niuerfimmi naliup qularnangitsumik kommunalbestyrelsip taarsigassarsitsineranit annerussanngilaq, piffissami annikillisaanermi ukiut kingullit eqqaassanngikkaanni. Illulioqataasoq maannakkut aaqqissuussineq malillugu nuunnissaq illuminillu tunisinissaq kissaatigissappagu, tunisinermin akit, piginnittut nikinnerini akilerneqartussatut aalajangersarneqartut kommunalbestyrelsimiit taarsigassarsiat akilernissaannut amerlanertigut naammaneq ajorput. Taamaattumik illuutilik teknikkikkut naliliineq toqqammavigalugu akiliisinnaanngilaq, tassa pisortat tunisineranni illup nalinganut naleqqiullugu illumi akiitsut annertunerusarmata. Ullumikkut illuutilit aningaasaqarnikkut ajornartorsiuteqalersinnaapput. Taamaattumik aaqqissuussinermi nutaami siunnersuutigineqarpoq, illuutilik killilersorneqarnani tunisinissamut imaluunniit kommunalbestyrelsimut tunisinissamut periarfissaqassasoq.

Illulioqataasoq tamanut ammasumik nalunaaruteqarnikkut illumik sanaqataaffigisaminik tunisinnaavoq, taamaalilluni kommunalbestyrelsip taarsigassarsiaani allatigullu piumasagaatit allangortinnagit pisisoq isersinnaalluni, tak. siunnersuummi § 21. Kommunalbestyrelsimiit taarsigassarsianut pisisoq nutaaq akisussaalissaaq peqatigisaanillu illulioqataasimasoq peqataajunnaarluni.

Tamanut ammasumik iluatsinngitsumik nalunaaruteqareernikkut illulioqataasup illu sanaqataaffiusoq kommunalbestyrelsimut pisiareqqullugu neqeroorutigisinnavaa, tak. siunnersuummi § 22. Kommunalbestyrelsimut akiitsut sinnerinut naapertuuttumik pisinermi

akiliuteqarluni illumik sanaqataaffiusumik kommunalbestyrelsi pisisinnaavoq.  
Kommunalbestyrelsimit taarsigassarsiat 0 kr.-imut appartinneqassapput peqatigisaanillu  
illulioqataasoq piginnittuujunnaarluni.

## *2.9 Sumiginnaasoqarnerani kommunalbestyrelsip tigusera, tak. § 24, tak. siunnersuummi § 7*

Taarsigassarsinermut piunasaqaatit sumiginneqarpata kommunalbestyrelsimit  
taarsigassarsiat akilernerqartussangussapput, tak. siunnersuummi § 23. Taarsigassarsianik  
sumiginnaanermi siunnersuutigineqarpoq kommunalbestyrelsip illu sanaqataaffiusoq  
tiguseraassagaa imaluunniit illu sanaqataaffiusoq pinngitsaaliinikkut akitsorterussinikkut  
tuniniarneqarnissaa piunasaralugu.

Illumik tigusera taarsigassarsisumik isumaqatigiissuteqarneq tunngavigalugu pissaaq. Pin-  
ngitsaaliinikkut tuniniaaneq Kalaallit Nunaanni eqqartuussisarneq pillugu inatsimmi tamanna  
pillugu malittarisassat tunngavigalugit pissaaq.

Nutaatut siunnersuutigineqarpoq aningaasaqarnikkut isumannaagassanik naatsorsuineq illup  
sanaqataaffiusup tunineqarnerani akia kommunalbestyrelsimut akiitsut sinneri ilanngaatigineri  
tunngavigalugit pissasoq. Siunnersuutigineqarpoq nikingassutaasut kommunalbestyrelsimut  
iluqaatsumik appartinneqassasut. Illup kommunalbestyrelsimut tunniunneqarneratigut  
kommunalbestyrelsimut akiitsut sinnerinut taarsigassarsisoq iparaassaaq.

Illumik sanaqataaffiusumik kommunalbestyrelsi tigusarpat tamatuma kingorna illu kommu-  
nalbestyrelsip nalinginnaasumik inissiaataanut attartortittakkanut ilaalissaaq imaluunniit illu  
nalinginnaasumik niuernikkut tunineqarsinnaalluni. Siunnersuutigineqarpoq illumik sanaqa-  
taaffiusimasumik tigusamik kingusinnerusukkat tunisinnermi illutut sanaqataasutut kommunal-  
bestyrelsi taarsigassarsisisinnaassanngitsoq, tak. siunnersuummi § 7.

## *2.10 Akiliutit suliakkiisarnerlu, tak. siunnersuummi §§ 25-27*

Siunnersuutigineqarpoq illumik sanaqataaffiusumik pissarsinermut taarsigassarsinermut  
atatillugu aamma piginnittut nikinnerini qularnaveqqusiussaqaarluni taarsigassarsinnermi  
allagartap atsiorneqarneranut atatillugu akiliummik akileeqqusinissamut kommunalbestyrelsi  
piginnaatitaassasoq.

Siunnersuut piginnaatitsissutitut ilusilernerqarpoq kisianni akiliummik akileeqqusinissamut  
pisussaaffilernagu. Politikkikkut pingaarnersiunerminut aamma nalinginnaasumik  
allaffissornikkut suleriaaseqarnermut atasumik akiliummik akiliisoqannginnissaa imaluunniit  
akiliummik annikitsumik akiliisoqarnissaa kommunalbestyrelsi aalajangiisinnaavoq.

Siunnersuutigineqarpoq, kommunalbestyrelsi Inatsisartut inatsisaat manna naapertorlugu suliassanik inissiatileqatigiiffimmut kommunimit imaluunniit Namminersorlutik Oqartussanit pigineqartumut, soorlu A/S Inissiatileqatigiiffik INI-mut imaluunniit Iserit A/S-imut suliakkiinissamik aalajangiisinnaassasoq.

Namminersortunut suliakkiinermi inatsisitigut tunngavissatut piumasaqaat marloqiusaq sukannernerusoq atuutissaaq. Ingerlatsisinnaanermik namminersortunut suliakkiinermi ilaatigut oqarsinnaatitaaffimmik namminersortumut tunniussinissamut inatsisitigut tunngavissaqarnissaq pisariaqarpoq, kisiannili aamma pisortat namminersortunut suliakkiineq pisussaaffittut tunniussinavaat. Inatsisitigut tunngavissami piumasaqaammut kingullermut oqartussaasup suliakkiisup ilitsersuisinnaaneranut, aammalu namminersortup piginnaatitaaffimmik tunniunneqartumik isumaginninneranut, taassumalu isumaqatigiissummik naammassinissinnaannginneranut misissuisinnaaneranut pisariaqarpoq.

Kommunalbestyrelsip ingerlatsisinnaanermik aammalu Inatsisartut inatsisaat naapertorlugu aqutsisinnaanermik suliffeqarfimmut namminersortumut isumaqatigiissuteqarnermini, suliffeqarfik namminersortoq ingerlatsinermut oqarsinnaatitaaffimmik isumaginninnissamut naleqqunnersoq isiginiassavaa. Tassunga ilanngullugu suliffeqarfiup ingerlatsinermi eqqarsaatissanik pisariaqanngitsunik isumaqarsinnaanissaa periaarsinnaannginnersoq isiginiarneqassaaq. Aamma suliffeqarfik allaffissornikkut, aaqqissuussaanikkut sulisoqarnikkullu ingerlatsinissamut oqarsinnaatitaanermik isumaginninnissamut pisariaqartinneqartunik peqarnersoq isiginiarneqassaaq.

Taakku saniatigut ingerlatsinissamut oqarsinnaatitaaffimmik suliakkiussaq pillugu aalajangiineq saqqummiunneqassaaq, taamaalillunilu innuttaasunit ilisimaneqalersinnaassalluni.

### *2.11 Sanaqataaffiusumik illuliassamik qinnuteqarneq tunineqarnerlu, tak. siunnersuummi §§ 28-32*

Ilumik sanaqataaffiusumik sanaartornermut imaluunniit pissarsinermut taarsigassarsiassanik qinnuteqarneq kommunalbestyrelsinut ataasiakkaanut nassiunneqassaaq tassanilu sularineqassalluni. Illumut sanaqataaffiusumut aningaasanik ataatsimut kommunalbestyrelsi pingaarnersiuisuuvoq aamma illut sanaqataaffiusut sumi qassillu sanaartorneqassanersut aalajangiissalluni.

Ilumik sanaqataaffiusumik sanaartornissamut taarsigassarsiassanik kommunalbestyrelsi aningaasaliisuuvoq. Illumik sanaqataaffiusumik sanaartornermut taarsigassarsiat taarsigassarsisumut tunniunneqassanngillat. Illuliassanik inniminniineq kommunalbestyrelsip isumagissavaa aamma illumik sanaqataaffiususamik sanaartornermi atugassanik sanasunik ilitsersuisunillu isumaqatigiissuteqassalluni aamma taarsigassarsinissamut neriorsuinermini sinaakkusiussat iluanni akiliinernik isumaginnissalluni.

## *2.12 Pisortanut akiitsut, tak. siunnersuummi § 29*

Siunnersuutigineqarpoq qinnuteqartoq 25.000,00 kr.-it sinnerlugit pisortanut akiitsunik akilerneqarsimanngitsunik akiligassaqarpat illumik sanaqataaffiusumik sanaartornermut imaluunniit pissarsinermit taarsigassarsisitsisoqarsinnaanngitsoq.

## *2.13 Sanariikkanik katitigassanik pissuseqatigiinnik akuersineq, tak. siunnersuummi § 35*

Illut sanaqataaffiusut ilaatigut pitsaassuseqarnissaat, nunaqarfinni illoqarfinnilu mikinerusuni sanaartornermut naleqquttuunissaat, aamma sanaqataasumut passukkuminartuunissaat qulakkeerniarlugu illut sanaqataaffiusut sanariikkatut katitigassatut pissuseqatigiittutut akuerineqartassapput. Sanariikkanik katitigassanik pissuseqatigiinnik akuersisoqarnissaanik qinnuteqaatinik suliarinnittut nalunaaruteqartartullu tassaapput Naalakkersuisut. Sanariikkanik katitigassanik pissuseqatigiinnik akuersinissaq pillugu qinnuteqaat assersuutigalugu kommunimit, illussamik titartaasartumit akuerisamit imaluunniit illussamik sanaartortartumit nassiunneqarsinnaavoq. Taamaalilluni aaqqissuussinermit ilusilersorneranullu sumiiffinni kissaatit pitsaanerusumik akuerineqarsinnaassapput.

Siunnersuutigineqarpoq illut sanaqataaffiusut nutaat pilersaarutaasumik piffissakkaartumillu aserfallatsaaliornissaat pillugit pilersaaruteqartillugit tunniunneqartassasut. Tassa imaappoq illuutilik illup qanoq akulikitsigisumik qalipattarnissaanut, qanoq akulikitsigisumik marra-sersuutit assigisaasalu taarserneqartarnissaannut pilersaaruteqassaaq, taamaalilluni illu aserfallannani. Taakkununga aningaasartuutit aamma missiliorneqassapput. Inoqutigiit illup atuuffiani aserfallatsaaliinnermut aningaasartuutit kivitsisinnaanerinik inoqutigiit nalilersuinissaannut periarfissaqartitsissaaq. Missingersuutit aningaaserivimmi siunnersorti peqatigalugu misissorneqarsinnaapput aamma taamaallaat aserfallatsaaliinnermut atorneqartussamut kontomut qaammatikkaartumik aningaasanik aalajangersimasunik akiliisoqartarnissaa pillugu isumaqatigiissusiortoqarsinnaalluni. Aningaasartuutit allat, soorlu sillimmasineq, illuutilip aamma qaammammut aalajangersimasumik akiliiffigisinnaavai. Taamaalilluni illuutilittut akiliinissamut pisussaaffit ajornannginnerusumik eqqortissinnaassavai.

Sanaartornissamut akuersineq nalinginnaasumik sanaartornerni ataasiakkaani tamani pissarsiariniarneqartarpoq, kisiannili sanariikkanik katitigassanik pissuseqatigiinnik akuersinerup malitsigisaanik kommunip sanaartorneq pillugu suliasanik suliarinninnera pisariinnerulersissavaa. Maannakkuugallartoq sanariikkanik katitigassanik pissuseqatigiinnik "Illorput 2100" taamaallaat kommunimi sanaartornissamut akuerisaapput. Illut pissuseqatigiit angissusaat assigiinngitsut marluupput 91 m<sup>2</sup> aammalu 112 m<sup>2</sup>. Illumik sanaqataanermut suliniummi akisussaasup, pisussaaffigaa sanariikkanik katitigassanik pissuseqatigiinnik akuersissutip naammassineqarnissaa siunertarlugu suliniummi atortut naatsorsuinerillu tulluurtumik iluarsineqarsimasut naalakkersuisoqarfimmut nassutissallugit. Sanariikkanik katitigassanik pissuseqatigiinnik akuersineq, ukiumut ataatsimut atuuttoq,

qinnuteqartoqarneratigut sivitsorneqarsinnaavoq. Sanariikkanik katitigassanik pissuseqatigiinnik akuersinerup nutaap atulersinnissaa siunertaralugu suliniummi atortut pisariaqartumik nutarterneqarnissaasa isumaginissaat suliniummi akisussaasup pisussaaffigai.

### **3. Pisortanut aningaasaqarnikkut allaffissornikkullu kingunissai**

Siunnersuut naatsorsuutigineqanngilaq pisortanut aningaasaqarnikkut kinguneqartitsissasoq. Sanaqateqarluni illuliamut taarsigassarsititsisup taamaatitsinerani aningaasat appaataasinnaasut inerneru kommuunbestyreliup pissarsiasaatut inissittussaagaluartut, tamanna kommuunimut aningaasaqarnikkut kinguneqartussaannngilaq, taarsigassarsisup sanaqateqarluni illuliamik piginniinnarnerani taarsigassarsiat ukiut 20-t ingerlanerini annertoqatigiimmik appariartortussaammata. Matuma siuliani imm. 1.1 aamma imm. 2.10 innersuussutigineqarput.

Siunnersuut pisortanut aningaasaqarnikkut sunnuteqassanngitsoq naatsorsuutigineqarpoq, naak inoqutigiit isertitaat annerpaamik 600.000 kr.-inut qaffanneqaraluartut, kommuunbestyreliup suliasat aningaasaqarnikkut killissaliussat illunut sanaqataaffiusunut atugassiissutigineqartut iluanni suliarisussaammata.

Naatsorsuutigineqarpoq siunnersuut ataatsimut isigalugu illumik sanaqataaffiusumik aqqissuussinermik aqutsinermut pisortanut allaffissornikkut artukkiinerup annikillineranik kinguneqarsinnaasoq. Ilaatigut matuma siuliani imm. 2.3 aamma 2.9 innersuussutigineqarput.

Illumik sanaqataaffiusumik sanaartornermut imaluunniit pissarsinermut taarsigassarsiasat pillugit qinnuteqarneq kommuunbestyrelsinut ataasiakkaanut nassinneqassaaq tassanilu suliarineqassalluni. Illumut sanaqataaffiusumut aningaasanik ataatsimut kommuunbestyrelsi pingaarnersuiisuuvoq aamma illut sanaqataaffiusut sumi qassillu sanaartorneqassanersut aalajangiisalluni.

Illumik sanaqataaffiusumik sanaartornissamut taarsigassarsiasanik kommuunbestyrelsi aningaasaliisuuvoq. Illumik sanaqataaffiusumik sanaartornermut taarsigassarsiat taarsigassarsisumut tunniunneqassanngillat. Illuliasanik inniminniineq kommuunbestyreliup isumagissuaa aamma illumik sanaqataaffiususamik sanaartornermi atugassanik sanasunik ilitsersuisunillu isumaqatigiissuteqassalluni aamma taarsigassarsinissamut neriorsuinermi sinaakkusiussat iluanni akiliinernik isumaginissalluni.

Taamaalilluni kommuunbestyrelsi, qinnuteqartoq suleqatigalugu, illumik sanaqataaffiusumik sanaartornermut atasumik suliamik suliarinninnernik annertuunik isumaginittuuvoq. Tamanna manna tikillugu Namminersorlutik Oqartussanit isumagineqartumik allaffissornermit, aammalu 1. januar 2017 aallarnerfigalugu kommuuninut tunniunneqartumit allaanerunngilaq. Tamanna siunnersuummi § 15, imm. 3-mut atatillugu isigineqassaaq. Taarsigassarsisumut atulernissaanut akuersissummik nalunaaruteqartoqarnissaata aamma

kommunalbestyrelsip taarsigassarsisitsineranut isumannaarisussamik kommunalbestyrelsimut qularnaveeqqusiussaqarluni taarsigassarsisitsinermit allagartap nalunaarsorneqarnissaata tungaanut illu sanaqataaffiusoq kommunalbestyrelsimit pigineqarpoq.

#### **4. Inuussutissarsiortunut aningaasaqarnikkut allaffissornikkullu kingunissai**

Siunnersuut inuussutissarsiortunut aningaasaqarnikkut imaluunniit allaffissornikkut kinguneqartitsissasoq naatsorsuutigineqanngilaq. naatsorsuutigineqarpoq Illumik sanaqataaffiusumik sanaartorluni sulinermit ilaasunik sanasunik qanittumik suleqateqarnermik kommunit pilersitsisinnaassasut naatsorsuutigineqarpoq.

#### **5. Avatangiisinut, pinngortitamut inuillu peqqissuunerannut kingunissat**

Siunnersuut avatangiisinut, pinngortitamut inuillu peqqissuunerannut kinguneqartitsissasoq naatsorsuutigineqanngilaq.

#### **6. Innuttaasunut kingunissat**

Siunnersuutip innuttaasunut kinguneqarnissaa naatsorsuutigineqanngilaq, sanaqateqarluni illuliat nutaat pilersaarutaasumik piffissanullu agguakkamik aserfallatsaaliorneqarnissaannut pilersaarusiortussaataaneq inoqutigiit piffissap taarsigassarsiat nungukkiartuaarfiisa ingerlanerani aserfallatsaaluiernermit aningaasartuutit nammassinnaanerlugit naliliinissamut periarfissaqarnerulernissaat ilimagineqarmat. Immikkoortumut 2.6 qulaani pineqartumut innersuussisoqassaaq.

Naatsorsuutigineqarpoq illulioqataasut, sanasut peqataasut kommunillu akornanni suliniutit ataasiakkaat pillugit qanittumik suleqatigiinnermik kommunit pilersitsissasut.

#### **7. Kingunissat annertuut allat**

Siunnersuut allanik annertuumik kinguneqartitsissanngitsoq naliliisoqarpoq.

#### **8. Oqartussanik suleqatigiiffinnillu il.il. tusarniaaneq**

Siunnersuut Naalackersuisut siuliinit siusinnerusukkut tusarniaassutigineqarpoq. Siunnersuutip ilusaa allanngornagu ingerlateqqinneqassasoq, nutaamillu tusarniaassutigineqarani ingerlateqqinneqassasoq kissaatigineqarpoq.

Siunnersuut ulloq 28. november 2017-imi [www.naalackersuisut.gl](http://www.naalackersuisut.gl) -imi tusarniaanermi nittartakkami tamanut saqqummiunneqarpoq aamma tusarniaanermi piffissaliussaq tassaalluni 29. december 2017.

Siunnersuut piffissami 21. november-imiit 29. december 2017-inut tusarniaaffigineqartuni ukunani tusarniutigineqarsimavoq:

Naalakkersuisut Siulittaasuata Naalakkersuisoqarfia  
Pingortitamut Avatangiisinullu Naalakkersuisoqarfik  
Aningaasaqarnermut Akileraartarnermullu Naalakkersuisoqarfik  
Aatsitassanut Ikummatissanullu Naalakkersuisoqarfik  
Aalisarnermut Piniarnermullu Naalakkersuisoqarfik  
Inuussutissarsiornermut, Suliffeqarnermut, Niuernermit Nukissiornermullu  
Naalakkersuisoqarfik  
Isumaginninnermut, Ilaqutariinnermut, Naligiissitaanermit Inatsisinillu Atuutsitsinermit  
Naalakkersuisoqarfik  
Peqqissutsimut Nunallu Avannarliit Suleqatigiinnerannut Naalakkersuisoqarfik  
Ilinniartitaanermit, Kultureqarnermut, Iisimatusernermit Ilageeqarnermullu  
Naalakkersuisoqarfik  
Namminiilivinnissamut, Nunanut Allanut Nunalerinerimullu Naalakkersuisoqarfik  
INI A/S  
Iserit A/S  
Agerskov Consulting ApS  
KANUKOKA  
Qaasuitsup Kommunia  
Qeqqata Kommunia  
Kommuneqarfik Sermersooq  
Kommune Kujalleq  
KANUNUPE  
SIK (Sulinermik Inuussutissarsiuteqartut Kattuffiat)  
Grønlands Erhverv (GE)  
Peqqinnissaq Pillugu Kattuffiit (PPK)  
Nunatsinni Perorsaasut Kattuffiat (NPK)  
Atorfillit Kattuffiat (AK)  
IMAK (Ilinniartitsisut Meeqqat Atuarfianeersut Kattuffiat)  
Akademikernes Sammenslutning i Grønland (ASG)  
Mittarfeqarfiit  
Nukissiorfiit  
Asiaq  
Kalaallit Nunaanni Naalagaaffiup Sinniisoqarfia  
Kalaallit Nunaanni Politimestereqarfik  
Kalaallit Nunaanni Eqqartuussivik  
Kalaallit Forsikring  
Illit Forsikringit  
Tryg  
Grønlandsbanken

BankNordik

Tusarniaaffigineqartut uku nalunaarput siunnersuummut oqaaseqaatissaqarnatik:  
Kalaallit Nunaanni Politimestereqarfik, INI A/S, Ilinniartitaanermut, Kultureqarnermut,  
Iisimatusarnermut Ilageeqarnermullu Naalakkersuisoqarfik, Sulisitsisut, Kalaallit Nunaanni  
Rigsombudsmandi kiisalu Nukissiorfiit.

Tusarniaanermut piffissaliussap naanerani tusarniaaffigineqartunit makkuninnga akissuteqaat  
tiguneqarpoq, tusarniaanermut akissuteqaammut oqaaseqaatit uingasumik allassimapput:

Illit Forsikringit apeqqutigaa, taarsigassarsisoq § 22, imm. 1, nr. 2 (maannakkut § 23, imm. 1,  
nr. 2) aamma § 34, imm. 2 naapertorlugit ikuallattoornissamut aamma illup ajoqusernissaanut  
akiliinngitsoorpat, sillimmasiisarfiit qanoq inissisimassanersut.

*Illup sanaqataaffiusup sukkulluunniit sillimmaserneqarsimanissaata qulakkeernissaanut,  
taarsigassarsisoq pisussaaffeqarpoq. Siunnersuummi § 34, imm. 3-imi erseqqissarneqarpoq,  
sillimmasiisarfiup kommunalbestyrelsi akiliinngitsoorsimaneq pillugu nalunaarfigisinnaagaa,  
kisianni tamatumunnga pisussaaffeqanngitsoq.*

Illit Forsikringit siunnersuutigaa § 29, imm. 3 (maannakkut § 30, imm. 3)

allangortinneqassasut imatut ”Kommunalbestyrelsi ikuallattoornissamut aamma pigisat  
atortuinut sillimmasiissummik sillimmasiinissamut, sillimmasiisarfinnit minnerpaamik 2-nit  
neqeroorummik piniassaaq.” Tamatuma saniatigut Kalaallit Nunaanni isertitaqarnissamut,  
ingerlatseqatigiiffinni Kalaallit Nunaanni aallartitaqartuni toqqaannartumik imaluunniit  
kalaallit tuniniaasartut aqutugalugit tamatuma pinissaanut immikkut piumasqaammik  
ilangussisoqassasoq, Illit Forsikringit siunnersuutigaa.

*Kommunalbestyrelsi ikuallattoornissamut aamma illup ajoqusernissaanut sillimmasiissummumut  
neqeroorummik piniartussaavoq, tamatuma saniatigut taarsigassarsisoq nammineerluni  
neqeroorummik piniarnissamut periarfissaqareerpoq. Kommunalbestyrelsi aamma  
taarsigassarsisoq nammineerlutik sillimmasiisarfinnik toqqaanissamut periarfissaqarput.  
Oqaaseqaat aalajangersakkap allangortinnissaanut pissutissaqalersitsinnigilaq.*

Kommunalbestyrelsi Akiliisitsiniarnermut oqartussamit oqaaseqaammik piniarnissamut  
pisussaaffeqarnermoq paasiniarlugu Qeqqata Kommuniata Akileraartarnermut Aqutsisoqarfik  
attaveqarfigaa.

*Kommunalbestyrelsi qinnuteqartup pisortanut akiitsui pillugit Akiliisitsiniarnermut  
oqartussamit imaluunniit qinnuteqartup attartortitsisumut akiitsui pillugit allaffissornikkut  
aqutsisumit oqaaseqaammik piniarsinnaanersoq pillugu qinnuteqartoq  
kommunalbestyrelsimut akuersissummik tunniussissasoq, aalajangersagaq  
ilanggunneqarpoq.*



Siunnersuummi § 9-p (maannakkut § 10) oqaasertalerneqarnera allatut oqaasertalerneqassasoq Qeqqata Kommunianit inassutigineqarpoq, tassami tamanna paatsoorneqarsinnaammat.

*Siunnersuummi § 10-mut immikkoortoq nutaaq ilanngunneqarpoq, qinnuteqartoq 5 %-imik nammineq akiliuteqassasoq, ersarissumik aalajangersaasumik.*

IMAK isumaqarpoq sanaqataanermik aaqqissuussinerup Tasiilamut atuutinnginnera ajuusaarnartoq, tassami tassani aamma inissaaleqineq annertummat.

*Siunnersuutip atuuffissaanni maannakkut aningaasaqarnikkut inissisimaneq aammalu niuerfimmi atugassarititaasut tunngavigalugit aningaasalersuutissarsisinnaanermut periarfissaqarneq, aallaavigineqarpoq.*

1. januar 2018 kommunit agguarsimanerat malillugu nassuiaatini nalinginnaasuni qupperneq 3-mi takussutissiaq nutarterneqassasoq, Aningaasaqarnermut Akileraartarnermullu Naalakkersuisoqarfiup siunnersuutigaa.

*Tamanna nassuiaatini ilanngunneqarpoq.*

Aningaasaqarnermut Akileraartarnermullu Naalakkersuisoqarfiup tikkuarpaa, inissiat inoqanngitsorpassuit 100 mio. kr.-inik taarsigassarsianik akilerneqanngitsunik peqarfiusut naatsorsorsimallugit, INI A/S-ip eqqumaffigeqqusimagaa. Kommunit inissiat inoqanngitsut pitsaanerusumik atorluarneqarnissaat aallutissagaa, Aningaasaqarnermut Akileraartarnermullu Naalakkersuisoqarfiup naatsorsuutigaa.

*Tusaatissatut tiguneqarpoq.*

*Taamatuttaa q paasissutissiissutigineqarsinnaavoq, assersuutigalugu BS-imit illuutit utertinneqarsimasut taakkualu tuniniarneqarnissaat eqqumaffigineqarnerulermat.*

## **Siunnersuummi aalajangersakkanut ataasiakkaanut nassuiaatit**

### *§ 1-imut*

#### Imm. 1-imut

Illunut sanaqataaffiusunut taarsigassarsiat aalajangersakkami pineqarput. Illutut sanaqataaffiusut isigineqarput illutut sanaqataaffissatut Naalakkersuisunit sanariikkanik katitigassanik assigiaartunik akuerineqarsimasut. Illuliassat illuliassatut naammassineqarsimasutut tunniunneqassapput sumiiffimmilu sanaartorneqarlutik. Illu sanaqataaffiusoq illulioqataasoq suleqatigalugu sanasunit ilinniarsimasunik ikiorteqarluni sananeqassapput.

Aalajangersakkami taamaallaat pineqarput illut sanaqataaffiusut, najugaqarfissatut atugassatut aalajangerneqarsimasut.

#### Imm. 2-mut

Nunaqarfinni aamma Kangaatsiami, Qaanaami aamma Ittoqqortoormiini illunik sanaqataaffiusunik nutaanik sanaartornermut imaluunniit pissarsinermut taamaallaat taarsigassarsisitsisoqarsinnaassasoq siunnersuutigineqarpoq. Nanortalimmi, Narsami, Qaqortumi, Tasiilami, Paamiuni, Nuummi, Maniitsumi, Sisimiuni, Aasianni, Qasigianguani, Qeqertarsuarmi, Ilulissani, Ummannami aamma Upernavimmi illunik sanaqataaffiusunik nutaanik sanaartornermut taarsigassarsisitsisoqarsinnaassanngitsoq siunnersuutigineqarpoq.

### *§ 2-mut*

#### Imm. 1-imut

Aalajangersakkami, kommunalbestyrelsi illunut sanaqataaffiusunut taarsigassarsititsissasoq aalajangersarneqarpoq.

#### Imm. 2-mut

Illumut sanaqataaffiusussamut taarsigassarsinissamut qinnuteqartoq inuussaaq nammineersinnaassuseqartoq.

Taarsigassarsinnaasut inunnut nammineersinnaasunut killilernerisigut inuit nammineersinnaajunnaarsinneqarsimasut kiisalu meeqqat 18-it inorlugit ukiullit illumik sanaqataaffiusumik pissarsinissamut taarsigassarsinissamut qinnuteqarnissamut peqataasinnaajunnaarsinneqarput. Aamma inatsisitigut pisinnaatitaasut pisussaatitaasullu taarsigassarsinissamut qinnuteqarnissamut peqataasinnaanngillat.

Qinnuteqartoq illoqarfimmi imaluunniit nunaqarfimmi illup sanaqataaffiusup sanaartorfisassaani imaluunniit sanaartorfisimasaani inuit nalunaarsorsimaaffianni najugaqartutut

nalunaarsorsimassaaq. Tamatuma kinguneraa illumik sanaqataaffiusumik sanaartornissamut taarsigassarsinissamut qinnuteqartoq illup sanaqataaffiusup sanaartorfigisassaani imaluunniit sanaartorfigisimasaani allami illoqarfimmi imaluunniit nunaqarfimmi inuit nalunaarsorsimaffiani nalunaarsugaasinnaanngitsoq.

Illup sanaqataaffiusup sanaartorfigisassaani imaluunniit sanaartorfigisimasaani allami illoqarfimmi imaluunniit nunaqarfimmi inuit nalunaarsorsimaffiani nalunaarsugaanngitsut illumik illulioqataaffiusumik nutaamik sanaartornissamut taarsigassarsiassanik qinnuteqarsinnaanngillat.

Taamaalilluni illumik sanaqataaffiusunik nutaanik sanaartornissamut pisortat sanaartornermi aningaasaataat sumiiffimmi pineqartumi illulioqataasup maannakkut inissiamik pisariaqartitsisut salliutinneqarnissaat matumani pingaartinneqarpoq.

### *§ 3-mut*

#### *Imm. 1-imut*

Illumik sanaqataasumi sanaartornissamut imaluunniit pissarsinissamut kommunalbestyrelsimit taarsigassarsiat inissiamik pisariaqartitsinerup aaqqinneqarnissaanut iluaqutaapput. Illut sanaqataaffiusut tassaapput sanariikkanik katitigassanik pissuseqatigiit akuerisaasut aamma najugaqarfissatut atorneqartussatut aalajangerneqarsimasut. Aalajangersakkami aalajangerneqarpoq, inuussutissarsiummit ingerlatsiviusumik imaluunniit ingerlatsiviusussamik illumik sanaqataaffigineqartussamik sanaartornissamut imaluunniit pissarsinissamut taarsigassarsisoqarsinnaanngitsoq.

Inuussutissarsiummi inissiap inuussutissarsiummik ingerlataqarnermut atorneqarnera eqqarsaatigineqarpoq. Inissiap tamarmiusup imaluunniit ilaannaata inuussutissarsiummik ingerlatsiviusunut taarsigassarsinissamut itigartitsinermik nalunaartoqassaaq. Tikeraat najugaqarfiattut imaluunniit tikeraat ineeraattut attartortitsineq, moteli, cabin, Bed and Breakfast, Airbnb, hotel assigisaalu inuussutissarsiummik ingerlatsinerussapput taamaattumillu taaguutip annikinnerusumik namminersorluni inuussutissarsiutip annikinnerusup avataaniillutik, takuuk imm. 2.

#### *Imm. 2-mut*

Inissiamiit namminersorluni inuussutissarsiummik annikitsumik ingerlatsinissaq akuerisaavoq, inissiaq annerusumik najugaqarfittut atorneqarpat.

Inuussutissarsiutitut namminersorfiusutut isigineqarput assersuutigalugu eqqartuussissuserisoq, nakorsatut sulineq, kukkunerisuisoq imaluunniit illussanik titartaasartoq. Inuussutissarsiut namminersorfiusoq aallaaviatigut atuagarsornikkut ilinniaqaqarnermik aalajangersimasumik pisariaqartitsivoq amerlanertigullu oqartussat tungaanniit nakkutigineqartarlutik.

Inissiaq annerusumik najugaqarfittut atorneqarneranik aalajangersimasumik kommunalbestyrelsi naliliissaaq. Nalinginnaasumik inuusutissarsiummut namminersorfiusumut annikitsumut inissiamut atorneqartoq inissiap ilaatut annikitsutut taamaallaat annertussuseqassaaq. Inuusutissarsiutitut namminersorfiusunut allanut assersuutitut eqqaaneqarsinnaapput kukkunersiuinermi allaffik mikisoq imaluunniit ussassaarisarfik, sullitanut atassuteqarneq illumit anilluni annerusumik pisarluni, ulluunerani paaqqinnittartoq namminersortoq imaluunniit isikkanik tagiartuisarfik.

Aalajangersagaq inissiami kingusinnerusukkut inuusutissarsiutinut aaqqissuussisoqarpat imaluunniit ingerlatsisoqarpat taarsigassarsiat akilerneqarnissaat pillugu aalajangersakkanik ilaneqassaaq, tak. § 23, imm. 1, nr. 4.

#### *§ 4-mut*

##### *Imm. 1-mut*

Illumik sanaqataaffiusumik sanaartornermut imaluunniit pissarsinermut kommunalbestyrelsip taarsigassarsisitsinera inissianik pisariaqartitsinerup aaqqinneqarnissaanut iluaqutaavoq. Siunnersuutigineqarpoq pisortat inissiaateqarfiini attartortittakkani inoqanngereersuni imaluunniit illunik sanaqataaffiusuni imaluunniit nammineq illuliani inoqanngiffiusuni nunaqarfinni imaluunniit illoqarfinni illumik sanaqataaffiusunik nutaanik sanaartornermut taarsigassarsisitsisoqassanngitsaq. Inatsisartut inatsisaat malillugu pisortat inissiaataannik attartortittakkanik soqassanngilaq, pisortat inissiaataanni attartortittakkani inatsisartut inatsisaat sukkulluunniit atuuttoq naapertorlugu inissiamik attartortittakkamik innersuussinissamut piumasaqaatit naammassineqanngippata, soorlu inissiami attartortittakkami inatsisartut inatsisaanni inoqutigiinni inuit amerlassusaasa aammalu init najugaqarfissat amerlassusaasa naapertuunnissaannik piumasaqaat naammassineqanngippat, imaluunniit inissiami attartortittakkami inissiap attartortittakkat immikkut innarluutilinnut ilusiligaanissaanut piumasaqaatit naammassineqanngippata.

Aalajangersakkamut aamma ilaapput piginneqatigiilluni inissianut peqatigiiffimmi piginneqataassutit piginneqataanerlu inissiamik atuisussaatitaanermut atassuteqarpat.

##### *Imm. 2-mut*

Illumik sanaqataaffiusumik sanaartornermut imaluunniit pissarsinermut kommunalbestyrelsip taarsigassarsisitsinera inissianik pisariaqartitsinerup aaqqinneqarnissaanut iluaqutaavoq. Siunnersuutigineqarpoq nunaqarfinni illoqarfinnilu pisortat inissiaataannik attartortittakkanik najorneqanngitsunik peqareerfusuni imaluunniit illunik sanaqataaffiusunik imaluunniit nammineq sanaartukkanik, inissianik attartortittakkanik innersuussinissamut piumasaqaatinik naammassinnittunik, inoqanngitsunik peqarfioreersuni illunik sanaqataaffiusunik nutaanik sanaartornermut taarsigassarsisitsisoqarsinnaassanngitsaq.

Inissiamik pisariaqartitsisinnaaneq inissiaq pioreersoq aqputigalugu matuniarneqassaaq. Illunik sanaqataaffiusunik nutaanik sanaartornermut kommunimi aningaasat sumiiffinni pisortat inissiaataannik attartortittakkanik najorneqarfiusunut sumiiffinnut salliutinneqassapput.

#### *§ 5-imut*

Aalajangersakkami sanaartornermi pilersaarusionermilu inatsisinut allanut pissutsit malittarisassaliorneqarput, aamma sanaartornermi pilersaarusionermilu inatsisinik atuuttunik eqqortitsinngitsunik sanaartornermut kommunalbestyrelsi taarsigassarsisitsinnginnissaata qulakkeerneqarnissaa siunertaalluni, illumik sanaqataaffiusumik pissarsinissamut kommunalbestyrelsi taarsigassarsisitsisinnaannngilaq, sanaartornermi pilersaarusionermilu inatsisinik atuuttunik sanaartorneq eqquutsitsinngippat.

Illumik sanaqataaffiusumik toqqaanermi sanaqataasup kiisalu kommunalbestyrelsi sanaanut immikkut piumasaqaatit Ittoqqortoormiini eqqaanilu nunaqarfinni kiisalu Tasiilap eqqaani nunaqarfinni inissiamik sanaartornermut atuuttut arajutsina veer saarneqassapput.

Tassunga atatillugu ”Sananeqaatit nammassinnaasassaat pillugit maleruagassat” 1, april 1995-imeersumut, Sanaartornermut Aqutsisoqarfiimit suliarineqarsimasunut innersuussisoqarpoq. Malugine-qassaaq maannakkut illunik sanaqataaffiusunik typenik akuersisarneq sukateriffigineqarsi-mammatt, tunumi immikkut anoritigut pissutsinut annertussusilerneqarsimasut. Illu sanaqa-taaffiusoq taanna taamaallaat qaarsumi aalajangersimatillugu sananeqarsinnaavoq.

Illut sanaqataaffiusut nutaat qaarsuni aalajangersimasuni peqqissunilu sananeqartassasut nalinginnaasumik kaammattuutigineqarpoq. Nunaannarmi toqqaviliineq pinngitsoorneqassasoq kaammattuutigineqarpoq. Silap pissusaata allanngornerata aamma nunap naqqani pissutsit allanngornerinik tamatuma malitsigisaatut naatsorsuutigisariaqartut tamanna malitsigaa.

#### *§ 6-imut*

Taarsigassarsinissaq pillugu qinnuteqaammik kommunalbestyrelsi suliamik suliarinninnera aalajangiineralu sanasunik isumaqatigiissuteqarnissaq imaluunniit sanaartornermi sulinerup aallartinnissaa sioqqullugu naammassineqarsimassapput. Taarsigassarsinissaq pillugu neriorsuutip nalunaarutiginnissaa sioqqullugu sanasunik isumaqatigiissusiortoqarsimappat imaluunniit sanaartorneq aallartinneqarsimappat sanaqataaffiusunik illuliortussanut nutaanut sanaartornermut tapersiissuteqarnissat pillugit qinnuteqaatinut kommunalbestyrelsi itigartitsissaaq.

Tamanna pissutigalugu aningaasalersuinissamut tunngavinni naammassineqanngitsuni iliuseqartoqarsinnaannngilaq. Aammattaaq kommunalbestyrelsi itigartitsinermik

nalunaaruteqarnissamik ajornartorsiuteqarsinnaanera naatsorsuutigalugu sanaartornermik aallartitsisimasinnaasunit qinnuteqartunit assuarnartumik kommunalbestyrelsip tatisimaneqarsinnaaneranut tamanna qulakkeerivoq.

Sanaartornissap isikkusnaanik, inissisimaffissaanik aningaasaqarnissaanillu misissornissaa piareersarnissaalu siunertaralugu, kommunalbestyrelsip taarsigassarsinissaq pillugu neriorsuineramik nalunaaruteqarnissaa sioqqullugu, taarsigassarsisussap siunnersortimik attaveqarnissaanut aalajangersagaq akornusiinngilaq.

#### *§ 7-imut*

##### *Imm. 1-imut*

Siunnersuutigineqarpoq illumik sanaqataaffiusussamik nutaamik sanaartornermut kommunalbestyrelsi taarsigassarsisitsisinnaasoq. Illu sanaqataaffiususaaq §§ 1 aamma 35-mi allaaserineqarpoq.

Illunut sanaqataaffiusunut nutaanut taarsigassarsisitsinernut aningaasat qassit immikkoortinneqassanersut politikkikkut pingaarnersiunermit nalinginnaasumik allaffissornikkut suleriaatsiminut atasumik kommunalbestyrelsi aalajangiissaaq.

##### *Imm. 2-mut*

Siunnersuutigineqarpoq illunik sanaqataaffiusunik naammassillugit sanaartorneqarsimanngitsunik pioreersunik pissarsinissamut kommunalbestyrelsi taarsigassarsisitsisinnaasoq. Atuilernissamut akuersissut nalunaarutigineqarpat illu sanaqataaffiusoq naammassillugu sanaartorneqarsimasutut isigineqassaaq.

Aalajangersakkami taamaallaat illut sanaqataaffiusut sanaartorneqartut pineqarput aamma neriorsuilluni allakkap atulersinneranit ullormiit ukiut marluk iluanni atuilernissamut akuersissut nalunaarutigineqarsimanani, tak. § 15. Pisuni taamaattuni taarsigassarsinissamut neriorsuineq atorunnaassaaq aamma illu sanaqataaffiusoq kommunalbestyrelsimit pigineqaannassalluni, tak. § 15, imm. 3.

Taamaalinerani sanaqataasumut nutaamut taarsigassarsinissamut neriorsuineramik kommunalbestyrelsi nalunaaruteqarsinnaavoq, taassumalu illu sanaqataaffiusoq naammassillugu sanaartorsinnaallugu.

§ 15-imi piffissaliussap iluani illumut sanaqataaffiusumut atuilernissamut akuersinermik nalunaartoqarsimappat § 7, imm. 2 atorneqassanngilaq. Illumik atuilernissamut akuersissut nalunaarutigineqareersimappat § 7, imm. 2 malillugu illumut sanaqataaffiusumut kommunalbestyrelsi taarsigassarsisitsisinnaanngilaq.

##### *Imm. 3-mut*

Taamaallaat illut sanaqataaffiusut suussusii akuerisat sananeqarnissaannut pissarsiarineqarnissaannullu taarsigassarsititsisoqarsinnaasoq aalajangersakkami erseqqissarneqarpoq. Kommunalbestyrelsi illut suussusii Naalackersuisunit akuerineqanngitsut sananeqarnissaannut pissarsiarineqarnissaannullu taarsigassarsititsisinnaanngilaq, takuuk § 35.

Imm. 4-mut

Aalajangersagaq Naalackersuisut qinnuteqaatinut suleriaatsit, piffissamut killiliussat, qinnuteqarnermi immersugassanik suliaqarneq aamma assigiissaakkanik atuisarneq pillugit maleruagassanik aalajangersaanissaannut inatsimmi tunngavissii voq. Kommunini ataasiakkaani assigiisaartumik suleriaaseqarsinnaanissamut, piffissanut killissaliisinnaanissamut il.il. piginnaatitsissut atorneqassasoq eqqarsaatigineqarpoq.

Inatsisartut inatsisaannut siunnersuummi matumani illut sanaqataaffiusut aqunneqarnerat kommunalbestyrelsinut ataasiakkaanut nuutinneqarpoq. Suliassaqarfimmi aqutsinermi misilittagaqarnermi, piffissamut killiliussat, kommunalbestyrelsit illunut sanaqataaffiusunut il.il. tapersivigineqarnissamik qinnuteqaateqartunut ikiunnissat pillugit maleruagassanik ilassutaasussanik pisariaqartitsisoqarnersoq paasinarsisinneqassaaq.

#### § 8-mut

Imm. 1-imut

Kommunalbestyrelsi pilersuisunit neqeroortitsissaaq, taamaalilluni ilisimatisissutigineqarsinnaanngorlugu pilersuisumik akit aalajangersimasut isumaqatigiissutigineqarsimasut, ukioq kaajallallugu inermut kuuffinnullu ikkussuinissap ilanngunneqannginnissaa periarfissaalluni. Aningaasartuutitut taarsigassarsiffiusinnaasunut ilaapput illuliassat katitigassat tamarmiusut pisarineqarneri tunniunneqarnerilu, assartuinermit, passussinermit sillimmasiinernullu aningaasartuutit ilanngullugit.

Illuliassamut katitigassamut aamma ilaavoq nalinginnaasumik kiassarnermik pilersuineq kissarsuut uuliartortoq. Sanariikkanik katitigassanik pissuseqatigiinnik akuersinermit atatillugu aamma nukissiuutit allat imaluunniit ilassutaasut assersuutigalugu seqerngup qinngorneranik tigooraassutit kiassarnermilu pumpit aamma akuerineqarsinnaapput.

Illup sanaqataaffiusup sanariikkanik katitigassanik assigiittut akuersineq pillugu siunnersuummi § 35-imut innersuussisoqarpoq.

Imm. 2-mut

Illumik sanaqataaffiusumik naammassillugu sanaartorneqarsimannngitsumik pioreersumik tigusinermi akimik kommunalbestyrelsi aalajangersaasuvoq. Tamanna nalinginnaasumik qanoq ittuuneranik naatsorsuinermit, illup sanaqataaffiusup naammassillugu sanaartornissaanut atortut ilassutissat suut pisariaqartuunerinik tunngaveqarpoq.

Atortut atorneqarsimannngitsut, sanaartorfiusumi uninngaannartut, atortut sanaartornermi ilaanissaannut tulluurtuunerinik isumannaarisooqarsinnaappat sanaartornermi taamaallaat ilaatinneqarsinnaapput tassungalu ilanngullugu atortut aanernik imaluunniit oqummik saassunneqarsimannngippata.

Aningaasartuutitut taarsigassarsiffiusinnaasunut ilaapput illumik sanaqataaffiusumik naammassillugu sanaartorneqarsimannngitsumik pioreersumik tigusineq kiisalu atortunik ilassutaasunik pisinermut, pilersuinermut, assartuinermut, passussinermut sillimmasiinernullu aningaasartuutit taamaalilluni illu sanaqataaffiusoq naammassillugu sanaartorneqarsinnaalluni atuillernissamillu akuersineq nalunaarutigineqarsinnaalluni.

Nalinginnaasumik illumik sanaqataaffiusumik naammassillugu sanaartorneqarsimannngitsumik pioreersumik tigusinermi aki imatut aalajangersarneqartariaqarpoq. Taamaalilluni aningaasartuutit taarsigassarsiffiusinnaasut tamarmiusut illumik sanaqataaffiusumik taamaaqataanik sanaartorneqartumut aningaasartuutitut taarsigassarsiffiusinnaasunut naapertuullutik.

Imm. 3-mut

Illumik sanaqataaffiusumik sanaartornermi tunngavigineqarpoq ilitsersuisumit ikiorneqarneq kiisalu sanasunit ilinniarsimasunit ikiorneqarneq. § 30 malillugu illumik sanaqataaffiusumik sanaartornermut taarsigassarsiasat pillugit qinnuteqaatip suliarinissaanut atugassanik toqqaviup, illup suliarineqannngitsup sananeqarneranut, innaallagissamik aamma vvs-imik ikkussuineranut kiisalu ilitsersuisumit ikiorneqarnermut neqeroorummik pissarsiniar-toqarnissaa. Aningaasartuutitut taarsigassarsiffiusinnaasunut taakkununga aningaasartuutit ilaapput.

Toqqaviup sanaartornissaanut neqeroorut (sanasumiit imaluunniit sanasut suliffeqarfianiit) Illup sananeqannngitsup sanaartornissaanut neqeroorut (sanasumiit imaluunniit sanasut suliffeqarfianiit)

Illumi vvs-imik ikkussuinissamut neqeroorut (saffiumit imaluunniit vvs-ilerisuniit). Innaallagissap kiisalu innaallagissamut atassutip ikkussuunnissaanut neqeroorut (innallagialerisumit akuerisaasumiit).

Neqeroorutip imassaanut illumik sanaqataasup suliassat nammineerluni isumagisinnaasaasa suuneri apeqqutaapput. Tunngaviumik sanaartornermi sulianik tamanik sanaqataasooq suliaqarsinnaavoq, tassani illumik sanaqataasooq akuerisatut nammineerluni akuerisaasimannngippat, suliassat akuerisaasumit suliarineqarnissamik pisariaqartitsiviusut eqqaassannngikkaanni. Assersuutigalugu tassaasinnaavoq innaallagisserisutut imaluunniit VVS-ilerisutut. Pingaaruteqarpoq sanaqataasusaaq suleqatigalugu kommunalbestyrelsip neqeroorummik pissarsiniarnissaa, taamaalilluni sanasunit ilinniarsimasunit suut suliarineqarnissaat naatsorsuutigineqarnerooq erseqqilluinnartumik allaaserineqarsimalluni.



Neqeroorut ima immikkoortitigaassaaq suliat suut neqeroorfigineqarnersut suullu pillugit isumaqatigiissuteqartoqarnersooq tamakkiisumik paasinarluni.

Aningaasartuutitut taarsigassarsiffiusinnaasunut ilaanngillat sanaartorfigissaanermut imaluunniit tamanut ammasumik inermut kuuffinnillu ikkussuinermit aningaasartuutit. Aningaasartuutitut taarsigassarsiffiusinnaasunut ilaanngillat illumi sanaqataaffiusumi sanariikkanik katitigassanik pissuseqatigiittut akuerisaasumi atortunik nalinginnaasumik pilersuinerup avataaniittut.

Imm. 4-mut

Aalajangersagaq Naalakkersuisut paasissutissanik tapertaasussanik piniartarnek pillugu maleruagassanik aalajangersaanissaannut inatsimmi tungavissaliivoq.

Inatsisartut inatsisaannut siunnersuummi matumani illut sanaqataaffiusut aqunneqarnerat kommunalbestyrelsinut ataasiakkaanut nuutinneqarpoq. Suliassaqarfimmi aqutsinermi misilittagaqarnermi, piffissamut killiliussat, kommunalbestyrelsit illunut sanaqataaffiusunut il.il. tapersiivigineqarnissamik qinnuteqaateqartunut ikiunnissat pillugit maleruagassanik ilassutaasussanik pisariaqartitsisoqarnersooq paasinarsisinneqarsinnaavoq.

#### *§ 9-mut*

Imm. 1-imut

Aalajangersakkami aalajangersarneqarpoq, illumik sanaqataaffiusumi sanaartornermut imaluunniit pissarsinermit kommunalbestyrelsip taarsigassarsisitsineranut taarsigassarsisoq ernianik imaluunniit akilersuutit akiliisassanngitsooq.

Imm. 2-mut

Aalajangersakkami aalajangersarneqarpoq, kommunalbestyrelsip taarsigassarsiarititai ukiut tamaasa angeqqatigiimmik ukiut 20-t ingerlaneranni assigiimmik annikilliartortinneqassasut. Illumut sanaqataaffiusumut piginnittussaataaneq kommunalbestyrelsimiit sanaqataasumut tunniunneqarneraniit sunnuteqalersumik taarsigassarsiat appariartortinneqalissapput, tak. § 15, imm. 3.

#### *§ 10-mut*

Imm. 1-imut

Siunnersuutigineqarpoq qinnuteqartup ukiuni kingullerni tallimani inaarutaasumik akileraaruserneqartunut inoqutigiit agguaqatigiissillugu isertitaat akileraaruserneqartussat tungavigalugit kommunalbestyrelsi illumut sanaqataaffiusumut taarsigassarsisinnaaneranik nalilersuissasooq. Qinnuteqartumut inoqutigiinnilu ilaasortanut ataasiakkaanut

agguaqatigiissillugu ukiumut isertitat akileraaruserneqartussat akileraartarnermut oqartussanit inaarutaasumik naatsorsuinerit tunngavigalugit naatsorsorneqassapput.

Inoqutigiit isertitaat tassaapput qinnuteqartup, aappaata inooqataataluunniit aamma meeqqat angerlarsimaffimmi najugaqartut, meeqqat 18-iliineqannginnerat 18-ileereersimaneralluunniit apeqqutaatinnagu, aammalu inuit allat qinnuteqartup inooqatiginngikkaluarlugit inoqutigisaasa ukiumut isertitaat akileraarutaasussat tamarmiusut.

#### Imm. 2-mut

Siunnersuutigineqarpoq kommunalbestyrelsimiit taarsigassarsiat siunnersuummi § 7 malillugu aningaasartuutit taarsigassarsiffiusinnaasut 95 %-ii tikillugit annertussuseqassasut. Aningaasartuutit sinneri, § 7 naapertorlugu aningaasartuutit taarsigassarsiviusinnaasut ikinnerpaamik 5%-iinik amerlassuseqartut taarsigassarsisup nammineq akiliutit akilissavai. Tassalu taarsigassarsisoq tamatigut nammineerluni aningaasartuutit taarsigassarsitsiviusinnaasut ikinnerpaamik 5%-iinik akiliuteqartassaaq. Taarsigassarsisup inoqutaasalu isertitaat akileraarutaasussat agguaqatigiissinneqarneri apeqqutaalluni nammineerluni akiligassaq taanna qaffasinnerusinnaavoq, tak. imm. 3 aamma 4.

#### Imm. 3-mut

Aalajangersakkami erseqqissarneqarpoq, qinnuteqartoq nammineerluni aningaasartuutit tamarmiusut uppersarneqartut 5 %-inik aningaasalersuissasoq.

#### Imm. 4-mut

Siunnersuutigineqarpoq taarsigassarsisup nammineq akiliutai aallaaviatigut inoqutigiit agguaqatigiissillugu ukiumut isertitaat akileraaruserneqartussat 300.000 kr.-it aallaavigalugit naatsorsorneqassasut. Taamaalilluni sanaqataasup nammineq akiliutissaanik aningaasalersuinissamut ileqqaarnissaq pillugu aningaasaqarnikkut pivusorsiorlumik tunngaveqarnissaq pingaartinneqarpoq.

Qinnuteqartoq agguaqatigiissillugu inoqutigiinni 300.000 kr.-inik taakkuluunniit inorlugit akileraaruserneqartussanik isertitaqarpat illumik sanaqataaffiusumik sanaartornermut imaluunniit pissarsinermut aningaasartuutit uppersarneqartut 95 procentit angullugit kommunalbestyrelsi taarsigassarsisitsisinnaavoq, tak. § 7. Qinnuteqartoq agguaqatigiissillugu inoqutigiinni 600.000 kr.-it sinnerlugit akileraaruserneqartussanik isertitaqarpat, assersuutigalugu 601.000 kr.-iuppata kommunalbestyrelsi taarsigassarsisitsisinnaanngilaq, tak. imm. 4. Agguaqatigiissillugu inoqutigiit isertitaat akileraaruserneqartussat 5.882,00 kr.-inik qaffannerinut naleqqiullugu 300.000 kr.-it tamanut kommunalbestyrelsip annerpaamik taarsigassarsisitsisinnaanera 1 procentpointimik appartinneqartassaaq. Ingerlaneq tabellimi ataaniittumik takutinneqarpoq.

<b>Isertitat kr.</b>	<b>Taarsiga ssarsiat</b>	<b>Taarsigas sarsiat kr.</b>	<b>Nammineerluni akiligassat %</b>
----------------------	--------------------------	------------------------------	------------------------------------

	%		
300.000	95,00%	1.900.000	5,00%
350.000	86,50%	1.730.000	13,50%
400.000	78,00%	1.560.000	22,00%
450.000	69,50%	1.390.000	30,50%
500.000	61,00%	1.220.000	39,00%
550.000	52,50%	1.050.000	47,50%
600.000	44,00%	880.000	56,00%

\* Taarsigassarsiassat sanaartornermut aningaasartuutit taarsigassarsititsiviusinnaasut 2 mio. koruuninut missiliorneqartut tunngavigalugit naatsorsugaapput.

Agguaqatigiissillugu inoqutigiinni 600.000 kr.-inik akileraaruserneqartussanik isertitaqartunut inunnut taarsigassarsiassat annertunerpaaffiat aningaasartuutit taarsigassarsiffiusunut 44 %-iilik annertussuseqarput tassa 880.000 kr.-it. Aningaasat taakku nunaqarfinni aamma Kangaatsiami, Qaanaami aamma Ittoqqortoormiini illulioriternernut aningaasalersuineq pillugu Inatsisartut inatsisaat naapertorlugu annerpaamik taarsigassarsiaasinnaasunut 880.000 kr.-inut naapertuupput.

#### Imm. 5-mut

Inoqutigiit isertitaasa akileraarutaasussat agguaqatigiissinneqarnerat 600.000 kr.-iniit annertuneruppat, qinnuteqartoq illumik sanaqataaffiusumik sananissamut neriorsuuteqarfigneqarsinnaanngilaq. Tamatumunnga taarsiullugu qinnuteqartoq illulioriternernut aningaasalersuisarneq pillugu Inatsisartut inatsisaat naapertorlugu qinnuteqarsinnaavoq.

### § 11-mut

#### Imm. 1-inut

Illumut sanaqataaffiusumik sanaartornermut imaluunniit pissarsinermut kommunalbestyrelsip taarsigassarsisitsinera annerpaamik aningaasartuutit taarsigassarsiffiusinnaasut 95 %-iilik annertussuseqarsinnaapput. Qinnuteqartup aningaasartuutit taarsigassarsiffiusinnaasut 5 %-ii nammineq akilertussaassavai. Isertitat tunngavigineqartut qaffakkiartorneri naapertorlugit nammineq akiliutissat qaffakkiartorput. Sanaartorfigissaanermut aamma innaallagissamut, inermut kuuffinnullu atassusernissaq pillugu pisortat piumasaqaataat malillugit aningaasartuutitut qinnuteqartoq aamma nammineq akiliisussaassaaq.

Taarsigassarsisup nammineq akiligassaminut kiisalu sanaartorfigissaanermut aamma innaallagissamut, inermut kuuffinnullu atassusernissaq pillugu pisortat piumasaqaataat malillugit aningaasartuutitut aningaasalersuisinnaanernut uppersaasoqarnissanik piumasaqaateqartoqarpoq. Taamaaliortoqarpoq sanaqataasup pilersaarummik naammassinnaanera qulakkeerniarlugu taamaalillunilu pilersaarutitut naammassineqartussatut naatsorsuutigineqartunut taamaallaat kommunalbestyrelsi

taarsigassarsisitsinnaalluni. Taarsigassarsinissamik qinnuteqartup nammineerluni aningaasaliinissamut uppersarsaat tassaasinnaavoq taarsigassarsinissamik qinnuteqartup aningaaserivianiit nalunaarut naatsoq, tasanilu taarsigassarsinissamik qinnuteqartup nammineerluni aningaasaliissutissaminik pigisaqarsinnaanera allassimasarpoq.

Imm. 2-mut

Siunnersuutigineqarpoq aningaasartuutitut taarsigassarsiffiusinnaasut tamarmiusunit taarsigassarsisup nammineq akiliutissai pillugit akiliisinnaaneranut uppersarsaammik kommunalbestyrelsimut sanaqataasoq saqqummiussiasoq. Tamatumunnga pissutaavoq inniminniinermit akiliussigallarnermik aamma illuliassanik katitigassanik akiliinissamik aamma sanasunut ilitsersuinermilu ikiorneqarnermut ingerlaavartumik akiliinissamik kommunalbestyrelsi isumaginnittussaammat. Akiliussinermi utertitsinissamut kommunalbestyrelsi qularnaveeqquteqartussavoq.

Imm. 3-mut

Aalajangersagaq Naalakkersuisut pissutsit qinnuteqartumi immikkut pingaartinneqartussat pillugit maleruagassanik aalajangersaanissaannut inatsimmi tunngavissaliivoq.

Pissutsit suut pingaartinneqassanersut kommunini ataasiakkaani assigiaartussanngorlugu, piginnaatitsissut atorneqartussatut eqqarsaatigineqarpoq.

Inatsisartut inatsisaannut siunnersuummi matumani illut sanaqataaffiusut aquneqarnerat kommunalbestyrelsinut ataasiakkaanut nuutinneqarpoq. Suliassaqarfimmi aqutsinermi misilittagaqarnermi, piffissamut killiliussat, kommunalbestyrelsit illunut sanaqataaffiusunut tapersiivigineqarnissamik qinnuteqaateqartunut ikiunnissat pillugit maleruagassanik ilassutaasussanik pisariaqartitsisoqarnerisooq paasinarsisinneqarsinnaavoq.

## *§ 12-imut*

Imm. 1-imut

Qinnuteqartumut inoqutigiinnilu ilaasortanut ataasiakkaanut agguaqatigiissillugu inoqutigiinni ukiumut isertitat akileraaruserneqartussat akileraarnermut oqartussaniit inaarutaasumik naatsorsuinerit tunngavigalugit naatsorsorneqassapput.

Taarsigassarsisitsinermi allagartap Kalaallit Nunaanni Eqqartuussivimmut nalunaarutigineqarnerani kommunalbestyrelsip akuersaassavaa taarsigassarsisitsinermi allagartap annertussaanut taamaallaat pineqarmat nammineerluni akiliutissamut attartorneq taakkununnga ilanngullugit sanaartorfigissaanermut pisortallu piumasaqaataat naapertorlugit innaallagissamut, imermut kuuffinnullu atassuserneqarnermut aningaasartuutitut uppersarsarneqartunut.

Imm. 2-mut

Illumik sanaqataasumi sanaartornissamut imaluunniit pissarsinissamut kommunalbestyrelsimit taarsigassarsiat tunniunneqassapput sanaqateqarluni illumut qularnaveeqqusiinermi tulliuttut, taarsigassaqartup nammineerluni akiliutissaata taarsigassarsiarinerata allanullu taarsigassarsianut sanaartorfigissaanermut, pisortallu piumasagaataat naapertorlugit innaallagissamut, imermut kuuffinnullu atassusiinermut uppersarneqartunut aningaasartuutaasa kingorna.

Kommunalbestyrelsip taarsigassarsiarititai illumut sanaqataaffiusumut qularnaveeqqusiinikkut isumannaarneqassapput. Pisortat taarsigassarsiarititai illumut sanaqataaffiusumut isumannaarneqarneratigut aalajangersakkakut aalajangersarneqassaaq pisortat taarsigassarsiarititaasa salliutinneqarnerat. Tamatuma saniatigut Kalaallit Nunaannut atuuttumi inatsimmi qularnaveeqqutit pillugit qularnaveeqqusiinermullu aalajangersakkat nalinginnaasut atuupput.

### *§ 13-imut*

Qinnuteqartoq ukiuni kingullerni tallimani inuussutissarsiuteqarluni ingerlasimangippat illumik sanaqataaffiusumik sanaartornermut imaluunniit pissarsinermut kommunalbestyrelsi taarsigassarsisitsisinnaangilaq. Inuussutissarsiuteqarluni ingerlatsineq paasineqassaaq tassaasoq, qinnuteqartup akissarsiaqarluni imaluunniit namminersorluni sulinera, taamaalillunilu qinnuteqartoq pisortanit pilersorneqanngitsoq, ilanngullugit pisortanit ikiorsiissutit imaluunniit ilinniarnersiuteqarneq.

Qinnuteqartoq ukiuni kingullerni tallimani inuussutissarsiummik ingerlataqarsimasutut isigineqassaaq qinnuteqartoq ukiuni akileraaruteqarfiusuni kingullerni tallimani kipineqanngitsumik inuussutissarsiummik ingerlataqarsimapput imaluunniit qinnuteqartoq ukiut akileraaruteqarfiusut kingulliit tallimat iluanni piffimmi ataatsimi arlalinniluunniit inuussutissarsiummik ingerlataqarsimappat. Piffissami sivikitsumi isertitakinnerup, soorlu ilinniarnermik suliffissaaleqinermillu peqquteqartumik, qinnuteqartup taarsigassarsinissamut itigartitaaneranik kinguneqartumik isertitat naatsorsornerinut annertooujussuarmik sunniuteqarsinnaanerata pinngitsoortinneqarnissaa siunertarineqarpoq. Ukiuni tallimani isertitat agguaqatigiissinneqarnerinik atuinermi tamanna pinngitsoortinneqassasoq qinnutigineqassaaq.

### *§ 14-imut*

Illumik sanaqataaffiusumik sanaartornermut imaluunniit pissarsinermut kommunalbestyrelsip taarsigassarsisitsinera inissianik pisariaqartitsinermik aaqüinissamut iluaqutavaoq. Siunner-suutigineqarpoq inuit, inissiamik pigisaqareersut imaluunniit pisortanit taarsigassarsiaqarlutik inissiamik piginneqataareersut peqatigisaanik illumik illulioqataaffiusumi sanaartornermut imaluunniit pissarsinissamut taarsigassarsisitinneqassanngitsut. Aalajangersakkamut aamma

ilaapput piginneqatigiilluni inissiami piginneqatigiiffimmi inissiamut atuisinnaatitaaffiusumi piginneqataassutit.

### *§ 15-imut*

#### *Imm. 1-imut*

Taarsigassarsisup ukiut marluk qaangiutinnginnerini illu sanaqataaffiusoq naammassillugu sanasimanngippagu atulersimanngippagulu taarsigassarsinissamut neriorsuutip atorunnaarnissaa aalajangersakkami aalajangersarneqarpoq.

Ukiunik marlunnik piffissaliineq nunaminertamik atugassinneqarnissamut piunasaqaammut inatsisitigut aalajangersarneqartumut naapertuuppoq, taannalu malillugu nunaminertamik atugassiisarnermi oqartussaasoq nunaminertamik atugassiinerminut atatillugu piunasaqarsinnaavoq, nunaminertaq atugassiissutigineqartoq nunaminertamik atugassiinermit akuersissuteqarnermiit ukiut marluk qaangiutinnginnerini atorneqassasoq, tak. pilersaarusiorneq aamma nunaminertat atorneqartarnerat pillugit Inatsisartut inatsisissaat nr. 17, 17. november 2010-imeersoq. Nunaminertaq atugassiissutigineqartoq nunaminertamik atugassiinermit piffissaliussap iluani atorneqanngippat, nunaminertamik atugassiineq taamaalillunilu nunaminertamik atuisinnaatitaaneq atorunnaassaaq.

Illu sanaqataaffiusoq naammassillugu sananeqarsimanngippat aammalu ukiut marluk iluanni atuilernissamut akuersissuteqartoqarsimanngippat, imm. 2 naapertorlugu taarsigassarsisoq saneqqutsinissamut qinnuteqartariaqassaaq.

#### *Imm. 2-mut*

Piffissaliussatut allassimasuniit kommunalbestyrelsi immikkut akuersisinnaavoq. Immikkut akuersisoqarnissaanut periarfissaq annerusumik eqqarsaatigineqarpoq sanaartorerup naammassingajalernerani kiisalu atuilernissamut akuersissutip atulersinnissaanut taamaallaat utaqqisoqartillugu atorneqartassasoq. Aalajangersakkami pingaarnertut eqqarsaatigineqartoq tassaavoq aningaasat akuersissutigineqartut siunertamut atorneqarnerisa qulakkeerneqarnissaa.

#### *Imm. 3-mut*

Siunnersuutigineqarpoq kommunalbestyrelsip taarsigassarsisitsinera illumik qularnaveeqqu-siilluni taarsigassarsisitsinerup allagartaq nalunaarsorneqarneratigut qulakkeerneqarnissaata tungaanut illu sanaqataaffiusoq kommunalbestyrelsimiit pigineqassasoq. Kommunalbestyrel-sip piginnittussaataitaneranut ilaavoq illup sanaqataaffiusup sananeqarnerata nalaa, atortut kiisalu illumi sanaqataaffiusumi sulinerup nalinga ilanngullugit.

Piviusumik illumut sanaqataaffiusumut atortunik pisineq pillugu pilersuisumik kommunalbestyrelsi isumaqatigiissuteqassaaq. Matuma kingorna atortut pilersuisumiit apuuffissaanut assartorneqarnissaat pillugit kommunalbestyrelsi isumaqatigiissuteqassaaq.

Illumut sanaqataaffiusumut piginnittussaataitaneq aatsaat taarsigassarsisumut nuussaaq atuilernissamut akuersissut nalunaarutigineqarpat aamma illumi sanaqataaffiusumi qularnaveeqqusiilluni taarsigassarsisitsinerup allagartaa oqaaseqaatitaqanngitsaq kommunalbestyrelsimit tiguneqarpat.

Aalajangersakkami siunertaq tassaavoq, illu sanaqataaffiusoq sanaartorneqanngippat imaluunniit sanaartorneqarnera unitsinneqarpat, taava illumut sanaqataaffiusumut naammassillugu sanaartorneqarsimanngitsumut kiisalu atortunut kommunalbestyrelsip oqartussaanerata qulakkeerneqarnissaa tassungalu ilanngullugu allamut tunniunneqarnissaa, tak. siunnersuummi § 7, imm. 2.

Imm. 4-mut

Piginnissinnaatitaaneq taarsigassarsisumut tunniunneqarsinnaanngippat, taarsigassarsisup sanaartorfissagissaanermut aammalu pisortat innaallagissamut, inermut kuuffeqarfimmullu atassusiinissamut piunasaqaataannut aningaasartuutai uppersarneqarsimasut kommunalbestyrelsip akilertussaagai aalajangersakkami aalajangersarneqarpoq.

Taarsigassarsisoq illumi sanaqataaffiusumi nammineerluni suliarisinnaasami nalinginut taarsiivigineqassanngilaq, taamaallaalli sanaartorfissagissaanermut pisortallu innaallagissamut, inermut kuuffeqarfimmullu atassusiinissamut piunasaqaataannut aningaasartuutit, § 11 naapertorlugu taarsigassarsisup nammineerluni akiligassai uppersarneqarsimasut akilerneqassallutik.

### *§ 16-imut*

Imm. 1-imut

Inatsisartut inatsisaat manna naapertorlugu illumut sanaqataaffiusumut suli taarsigassarsiaqartoqartillugu taarsigassarsisoq imaluunniit taarsigassarsisup inoqutai illumi najugaqartussaataassasut aalajangersakkami aalajangersarneqarpoq. Tamatuma kingunerisaanik illumik sanaqataasup imaluunniit taassuma inoqutigisaanit inunnik inissiami najugaqartoqarnissaa piunasaqaataavoq. Najugaqartussaaneq illumik sanaqataasooq illup sanaqataaffiusup sumiiffigisaani najugaqartutut nalunaarsorsimalluni, kisiannili illumi najugaqanngippat taamaallilluni naammassineqarsimassanngilaq.

Najugaqartussaaneq naammassineqanngippat kommunalbestyrelsip taarsigassarsisitsinera akiligassanngussaaq, tak. § 23, imm. 1, nr. 5. Najugaqartussaaneq naammassineqassaaq illumik sanaqataasooq imaluunniit inuk illumik sanaqataasup inoqutigisaanut ilaasoq, sivikinnerpaamik ukiumut ulluni 180-ini illumi sanaqataaffiusumi unnuisimappat.

Najugaqartussaataitaneq taamaallaat atuutissaaq, Inatsisartut inatsisaat manna naapertorlugu illumut sanaqataaffiusumut taarsigassarsianik peqartillugu. Ukiut 20-t qaangiunnerini illumut

sanaqataaffiusumut taarsigassarsiat nunguppata, najugaqartussaataaneq atuukkunnaassaaq aammalu taarsigassarsisup illu sanaqataaffiusoq qanorluunniit atorsinnaalissavaa.

Imm. 2-mut

Illumik sanaqataaffiusumik piginnittup imaluunniit taassuma inoqutaasa ilaata illu sanaqataaffiusoq najugaqarfigippassuk najugaqartussaataaneq naammassineqassasoq aalajangersakkami aalajangersarneqarpoq. Illumut sanaqataasumut inoqutigisaanut ilaapput aappaa, inooqatigisaa, meeqqat angerlarsimaffimmi najugaqartut kiisalu inuit allat illumik sanaqataasup inoqutigisai, inooqatigiinnertut pissuseqanngikkaluarpalluunniit.

Inuit, suliffitsik aqputigalugu piffissap ilaani nunani allaniittut eqqarsaatigalugit, assersuutigalugu timmisartortartut, najugaqartussaannermut piunasaqaammut naleqqiullugu illumik sanaqataaffiusumik piginnittut pineqartut sivikinnerpaamik ukiumut ulluni 180-ini unnuisarsimanissai taamaattumik pingaaruteqarpoq.

Najugaqarnissamut piunasaqaat naammassiniarlugu illumik sanaqataasup inoqutaanit minnerpaamik ataatsip illumi sanaqataaffiusumi sivikinnerpaamik ukiumut ulluni 180-ini unnuisimanissaa piunasarineqarpoq. Tassalu unnuisarnerit amerlassusaat inoqutigiit tamarmiusut naatsorsuutigineqassanngilat, kisiannili inoqutigiinni inuit ataasiakkaarlugit naatsorsuiffigineqassallutik. Inoqutigiit arlaannaalluunniit illumi sanaqataaffiusumi ataatsimut isigalugu ukiumut ulluni 180-ini unnuisimanngippat, najugaqarnissamut piunasaqaat naammassineqarsimassanngilaq.

Illumik sanaqataaffiusumik atuneq piffissami allanut tunniunneqarpat imaluunniit najugaqarfigineqanngikkallarpat tamanna taamaallaat pisinnaavoq §§ 17-18 aalajangersakkat aqputigalugit.

### *§ 17-imut*

Imm. 1-imut

Inunnut nammineersinnaassusilinnut 18-nileereersimasunut inuinnarnullu taamaallaat attartortitsisoqarsinnaavoq. Suliffeqarfimmut imaluunniit ingerlatseqatigiiffimmut, assersuutigalugu sulisunut inissiatut atugassanngorlugu, illumik sanaqataaffiusumik attartortitsisoqarsinnaanngilaq.

Piginnittup taassumaluunniit inoqutaasa peqannginnerat utaqqiisaasumik pissasoq, piffissallu attartortitsiviusup naanerani piginnittoq illumut nooqqissasoq najugaqassasorlu piunasaqaataavoq. Qaammatit pingasut inorlugit sivikitsumik peqannginneq illumik sanaqataaffiusumi attartortitsinissamut pisinnaatitsinngilaq. Utaqqiisaasumik peqannginnermi attartortitsineq aallaaviatigut piffissamut qaammatit aqqaneq marluk tikillugit taamaallaat pisinnaavoq.



Imm. 2-mut

Imm. 1-imi piffissamik killiliineq apequtaatinnagu piginnittup taassumaluunniit inoqutaata peqannginnerat utaqqiisaasuuppat aamma napparsimanermik, ilinniarnermik, pineqaatissinneqarsimasunut inissiisarfimmi inissinneqarnermik, inuiaqatigiinnik sullissinermik imaluunniit utaqqiisaasumik nuuttitaanermik peqquteqarpat piffissami killiligaanngitsumi illu sanaqataaffiusoq attartortinneqarsinnaavoq imaluunniit najugaqarfigineqarani. Taamatut pisoqartillugu attartortitsineq imaluunniit illumik sanaqataaffiusumik najugaqarfigineqannginnera akuerineqarsinnaavoq naak tamanna illumik sanaqataaffiusumik qaammatinik aqqaneq marlunnik sivilunerusumut attartortitsinermik imaluunniit najugaqarfigineqannginneranik kinguneqaraluarpuunniit.

Napparsimanermut assersuutitut eqqaaneqarsinnaavoq, sanaqataasoq nunaqarfimmi sanaqataasup najugaqarfiani katsorsarneqarsinnaanngitsumik nappaateqarpat, taamaattumillu sanaqataasoq katsorsartikkiartorluni imaluunniit mernguersariartorluni peqqissariartorlunilu utaqqiisaasumik nuuttariaqarpat, taamaattumillu piginnittoq napparsimareernermi kingorna nukittorsariartorluni piffissami sivilinnerusumi sivilunerusumiluunniit aallartariaqassappat.

Ilinniarnermut assersuutit taaneqarsinnaavoq, sanaqataasup sulisitsuminit piumaffigineqarluni imaluunniit teknikkikkut ineriartorneq peqqutigalugu ilinniaqqittariaqarpat, illup sanaqataaffiusup sumiiffiani nunaqarfimmi ingerlanneqarsinnaanngitsumik, imaluunniit sanaqaasoq sulilerniarluni allamik ilinniagaqartariaqarpat.

Nuutsitaagallarnermut assersuutitut eqqaaneqarsinnaavoq, piginnittoq piginnittulluunniit inoqutaanit inuk ataaseq allamut suliarortinneqarpat. Aamma pisut ilaanni piginnittoq taassumaluunniit inoqutai piffissap ilaani suliniarlutik allamut nuunnissartik toqqarsinnaavaat, illoqarfimmi nunaqarfimiluunniit piginnittup illuata sanaqataaffiusup inissisimaffiani suliffissaqarniarneq peqqutigalugu tamanna pisariaqalersimappat.

Aamma peqannginnissaq piginnittup aappaanut, inooqataanut meeraanulluunniit tunngatillugu pisunik assingusunik peqquteqarsinnaavoq, illumik sanaqataaffiusumik piginnittup aallaqataasariaqarneranik kinguneqartumik.

Matuma siuliani assersusiaasut, imm. 2-mut ilaatinneqartut tamakkiisuunngillat.

Imm. 3-mut

Illumik sanaqataaffiusumik attartorneq pillugu isumaqatigiissut kommunalbestyrelsimi akuerineqassaaq. Attartorneq siunnersuummi § 18 naapertorlugu pinersaq kommunalbestyrelsip nakkutigissavaa.

Attartornissamut piumasaqaatit atunnersut aamma piffissaliussat iluaniinnersaq kommunalbestyrelsip nakkutigissavai. Attartornermi isumaqatigiissut akuerisaasoq atorneqarnerisik kiisalu ineqarnermut akiliut allatigullu piumasaqaatit inissianik attartorneq

pillugu inatsisartut peqqussutaanni pisortat inissiaataanni attartortittakkat pillugit aalajangersakkanut naapertuunnersut kommunalbestyrelsip nakkutigissavai, tak. § 18.

Imm. 4-mut

Pisuni imm. 2-mut ilaatinneqartuni illumik sanaqataaffiusumik piginnittup illu sanaqataaffiusoq najugaqarfigisinnaanngippagu, piginnittoq aalajangersinnaavoq illumik sanaqataaffiusoq najugaqarfigineqanngikkallassoq. Illumik sanaqataaffiusumik piginnittup illup attartortinneqarnissaa kissaatiginngippagu taamaalilluni periarfissaassaaq illumik sanaqataaffiusoq piffissami inoqanngikkallarnissaa. Illumik sanaqataaffiusumik piginnittoq kommunalbestyrelsimut nalunaaruteqassaaq piffissami qaqugukkut illumik sanaqataaffiusoq inoqanngikkallassanersoq illumillu sanaqataaffiusumik piginnittup illup najugaqarfigisinnaanngikkallarnernanut suna peqqutaanersoq.

*§ 18-imut*

Imm. 1-imut

Illumik sanaqataaffiusumik attartorneq pisortat inissianik attartortittakkanik attartornermut sanilliunneqassaaq. Inissianik attartorneq pillugu Inatsisartut peqqussutaat naapertorlugu Namminersorlutik Oqartussanit akuerisaasunik attartornermi isumaqatigiissut atorneqassaaq.

Imm. 2-mut

Attartortitsineq pisortat inissiat attartortittagaat assigalugit piumasaqaatit assingi atorlugit pissasoq aalajangersakkami aalajangersarneqarpoq. Taamaattorli ineqarnermut akiliut inissianik attartorneq pillugu Inatsisartut peqqussutaanni malittarisassanik appasinnerusumik isumaqatigiissutigineqarsinnaalluni.

Imm. 3-mut

Illumik sanaqataasup illu pequteqartillugu attartortippagu, piginnittup ineqarnermut akiliutip annerpaamik 10 %-anik ilallugu ineqarnermut akiliut aalajangersarsinnaagaa, aalajangersakkami aalajangersarneqarpoq.

Imm. 4-mut

Attartorneq pillugu isumaqatigiissut attartortup sanaqataasumik allatigut isumaqatigiissuteqarnissaa pillugu isumaqatigiissuteqarnissamik piumasaqaateqassanngilaq.

Attartortup assersuutigalugu sanilip biilianik pisinissanik, sanaqataasup qamuteraalaanik attartornissaq imaluunniit sanaqataasup pequtaanik pisinissaq pillugu attartorneq pillugu isumaqatigiissummi piumasaqaateqarnissaq taamaalilluni akuerineqanngilaq. Taamatut ittunik isumaqatigiissusiortoqarsimappat isumaqatigiissut taanna attartornermi isumaqatigiissummi piumasaqaateqartoq atuussinnaannngilaq. Attartorneq pillugu isumaqatigiissut atuutissaq. Kisiannili tassunga atasumik piumasaqaatit atuunnatik.

Isumaqatigiissutit, attartorneq pillugu isumaqatigiissummut atasumik isumaqatigiissutaasut, assersuutigalugu innaallagissamut, imermut, kiassarnermut, kuuffeqarnermut assigisaanullu nalunaarneq aalajangersakkamut ilaanngillat. Aalajangersagaq annertuumik paasineqassaaq taamaalillunilu isumaqatigiissutinut assigiinngitsunut tamanut atuulluni. Matuma kingorna pingaaruteqanngilaq isumaqatigiissut alla, attartorneq pillugu isumaqatigiissummi piumasaqaatigineqartoq, assersuutigalugu allakkatut immikkoortutut imaluunniit oqaasiinnakkut naammassineqarnermaq aalajangiisuunngilaq.

Aammattaaq erseqqissaatigineqassaaq, isumaqatigiissutinik allanik attartornermi piumasaqaateqarnissamut inertequssutip paarlattuanik, allanik isumaqatigiissuteqarnissamut inertequssutaanngimmat, isumaqatigiissutit taakku allat attartorneq pillugu isumaqatigiissummi piumasaqaatigineqanngippata.

Imm. 5-imut

Attartortoq attartorneqartumik allanut atuutitseqqusaanngilaq. Taamaattoqartillugu attartortitsineq pillugu isumaqatigiissut kalerriuteqaqqaarnani atorunnaassaaq attartortorlu ingerlaannartumik illumit sanaqataaffiusumit anissalluni. Attartortoq inissianik attartorneq pillugu Inatsisartut peqqussutaanni attartortitsinissamut pisinnaatitaaffik pillugu aalajangersakkanik patsiseqarniarsinnaanngilaq.

#### *§ 19-imut*

Imm. 1-imut

Illumik sanaqataasumut taarsigassarsianik appartinneqarsimanngitsunik peqartumut inatsisitigut atuinissamut killiliinerit suut atuunneri aalajangersakkami malittarisassaliorneqarput. Atuinissamut killiliinerit illumi sanaqataaffiusumi pisortani taarsigassarsiaqartillugu atuutissapput. Akiitsut sinneri akilernerisigut atuinissamut killiliussanit allanneqartunit piffissami qaqugukkulluunniit taarsigassarsisoq anisinnaavoq.

Atuinissamut killiliinerit sanaqataasumik isumaqatigiissuteqarnikkut, taarsigassarsianik sumiginnaanikkut aamma pinngitsaaliilluni akitsorterussinikkut illumik sanaqataaffiusumik kommunalbestyrelsi tigusinissaminut periarfissaqarneranut tapertaapput aamma § 12-ip malitsigisaanik illumik qularnaveeqqusiisoqanngikkaluartoq.

Imm. 2-mut

§ 12-imut sinaakkusiussat aamma siunnersuummi § 12-imut ilaasut qularnaveeqqusiussaqluni taarsigassarsinermi allagartaq tunngavigalugu eqqartuussivikkut malersuineri qularnaveeqqusiisoqarsinnaasoq erseqqissarneqarpoq.

Imm. 3-mut

Illup ikuallattoornissaanut sillimmasiineri akiligassamik akiliinngitsoortoqartillugu illumut

akiliussigallarnikkut akiliisitsiniartoqarsinnaassasoq kingornatigullu pinngitsaaliissummik tuniniaasoqarsinnaassasoq aalajangersakkami aalajangersarneqarpoq.

Aningaasatigut ingerlataqarneq pillugu inatsisip Kalaallit Nunaannut atuutilersinnera pillugu peqqussut nr. 1252 15. december 2004-meersoq, kingullertigullu peqqussut nr. 1688 16. december 2015-imi allangortinneqartumi § 60-ip malitsigisaanik sillimmasiisarfiit akiliinissamut kinguaattoortoqarsimagaluarpalluunniit illup ikuallattoornissaanut sillimmasiineramik atorunnaarsitsisinnaanngillat. Tamatuma peqatigisaanik nassuerutigineqarpoq, sillimmasiisarfik sillimmasiinermi akiligassanut erniaannullu aammalu aningaasartuutinut allanut qularnaveeqqusiisinnaatitaasoq. Sillimmasiisarfik akiligassanik akiliinngitsoorneq peqqutigalugu illup ikuallattoornissaanut sillimmasiissummik atorunnaarsitsisinnaanngimmat, sillimmasiisarfiit illumut sanaqataaffiusumut akiliussititsigallarnikkut akilinngitsuukkanik akiliisitsiniarnissamut, tamatumalu kingorna Kalaallit Nunaanni pinerluttulerinermut inatsimmi pinngitsaaliissummik tuniniaasarnermut maleruagassat naapertorlugit pinngitsaaliissummik tuniniaanissamut inatsisitigut tunngavissinneqarput.

#### *§ 20-mut*

##### *Imm. 1-imut*

Illumik sanaqataaffiusumik sanaartornermut imaluunniit pissarsinermut kommunalbestyrelsimit taarsigassarsiat piginnittut nikinnerini pingaarnertut akiligassanngortinneqassasut, tassalu § 20, imm. 2-mut aamma § 21-mut ilaasut piginnittut nikinneri ilanngunagit, aalajangersakkami aalajangersarneqarpoq.

##### *Imm. 2-mut*

Aalajangersagaq imm. 1-imut ilaatitsinngiffiuvoq, tassanilu aalajangersarneqarpoq, pisuni arlalinni, ataatsimut ilaqutariit iluanni piginnittut nikinnerannik taaneqarsinnaasuni piginnittut nikissinnaasut, aammalu kommunalbestyrelsimit taarsigassarsianut akiitsut piumasaqaatit allangortinnagit tiguneqarsinnaasut.

Aappaasutut aamma aapparisaatut nalunaarsugaq isigineqassaaq.

Sanaqataasup illu sanaqataaffigisani inooqatiminut, sanaqataasup aappaanut tunniussinermut piumasaqaatit assingi atorlugit tunniussinnaavaa, taamaattorli tak. imm. 3.

##### *Imm. 3-mut*

Inooqataasup sanaqateqarluni illuliamik aammalu piumasaqaatit allangortinnagit kommunalbestyrelsimit taarsigassarsianut akiitsunik tiguisinnaanissaanut, pineqartup sivikinnerpaamik ukiuni marlunni taarsigassarsisumut ataatsimoortumik inoqutaasimanissaa inuillu allattorsimaffianni nalunaarsorsimanissaa piumasarineqarpoq. Tassalu inooqataasup allami najugaqarluni taarsigassarsisumi najugaqartutut inuit allattorsimaffiani

nalunaarsorsimanissaa naammanngilaq. Aappariinnut piffissamut piomasagaateqartoqanngilaq.

#### *§ 21-mut*

Imm. 1-imut

Taarsigassarsisup illumik sanaqataaffiusumik niuernermi killeqanngitsumik tuniniaasinnaanissaa aalajangersakkami aalajangersarneqarpoq. Taarsigassarsisup illu sanaqataaffiusoq sumiiffimmi aviisimi kiisalu nuna tamakkerlugu aviisimi minnerpaamik ataatsimi allagarsiissutigineqarneratigut tuniniassagaa, taamaalillunilu kikkut tamarmik illumut sanaqataaffiusumut neqerooteqarnissamut pisinissamullu periarfissinneqassasut piomasarineqarpoq.

Illumik sanaqataaffiusumik tamanut ammasumik tuniniaanermi akit tunisinernullu piomasagaatit allat kommunalbestyrelsimit susassarineqanngillat. Tassalu tuniniaanissaq sioqqullugu kommunalbestyrelsi akuersitinneqartariaqanngilaq.

Imm. 2-mut

Illumik sanaqataaffiusumik tunisinermi taarsigassarsiani piusuni kommunalbestyrelsimut akiitsumik pisisoq tigusinnaavoq piomasagaatit allanngortinnagit. Kommunalbestyrelsimit taarsigassarsiat qaqugukkulluunniit naammassillugit akilerneqarsinnaapput.

#### *§ 22-mut*

Taarsigassarsisoq sumiiffimmi aviisimi kiisalu nuna tamakkerlugu aviisimi tamanut ammasumik tuniniakkamik nalunaaruteqareernikkut illumik pisinissamik neqeroorummik tigusaqarsimangippat taarsigassarsisumik isumaqatigiissuteqarnikkut kommunalbestyrelsip akiitsut sinneri isumannaarnerisigut illu sanaqataaffiusoq tigusinnaavaa. Kommunalbestyrelsili illumik sanaqataaffiusumik tigusinissamut pisussaaffeqanngilaq.

#### *§ 23-mut*

Imm. 1-imut

Kommunalbestyrelsimit taarsigassarsiat qanoq pisoqarnerani akiligassanngortinneqassanersut aalajangersakkami malittarisassaliorneqarpoq.

Nr. 1-imut

Taarsigassarsisoq illup sanaqataaffiusup illersorneqarsinnaasumik aserfallatsaaliornissaanut pisussaaffeqarpoq. Tamanna isumaqarpoq taarsigassarsisoq tamatuma pisariaqartinnera naapertorlugu illup immikkoortuisa ilaanik taarsisassasoq imaluunniit iluarsaassisassasoq, assersuutigalugu qaliaq ussiittoq imaluunniit igalaat ussiittut taarserlugit imaluunniit

iluarsaallugit. Aammattaaq taarsigassarsisoq illup sanaqataaffiusup aaqqissugaasumik aserfallatsaaliornissaa isumagissavaa, assersuutigalugu silataa qalipattarlugu, pisariaqartinneratigut. Kommunalbestyrelsip aamma taarsigassarsisup illumut sanaqataaffiusumut ilaasumi pilersaarutaasumik piffissakkaartumik aserfallatsaaliinissamut pilersaarut aallaavigisinnaavaat. Kommunalbestyrelsi aalajangersakkamut matumunnga atortitsisinnaavoq qularnaveeqqusiimasutut nakkutilliinikkut, tassani paasineqarsinnaalluni qularnaveeqqusiussaq piunersaq aamma pitsaasumik aserfallatsaaliorneqarsimasutut isikkoqarnersaq.

Nr. 2-mut

Ikuallattoornissamut illullu ajoqusernissaanut illu sanaqataaffiusoq sillimaserneqarsimanngippat akiliinissamut pissutaasinnaavoq, tassa illumi sanaqataaffiusumi sillimaserneqarsimanngitsumi ajoqusernerit annertuut kommunalbestyrelsip qularnaveeqqusiussaanut annertuumik ajorseriarnermik kinguneqartussaammata. Taamaalilluni taarsigassarsisup minnerpaamik ikuallattoornissamut illullu ajoqusersinnaaneranut matussusiisumik taarsigassarsisup sillimasersimanissaa pillugu piomasagaat illumi sanaqataaffiusumi qularnaveeqqusiinerup isumannaarnissaanut taarsigassarsisitsisup soqutigisaanik aallaaveqarpoq. Ikuallattoornissamut illullu ajoqusersinnaaneranut eqqarsaatigineqarpoq nalinginnaasumik sillimasiineq, ikuallattoornissamut illullu ajoqusersinnaaneranut illumut sillimasiissutaasartoq.

Nr. 3-mut

Taarsigassarsisoq tamakkiisumik ilaannakuusumilluunniit illumik sanaqataaffiusumik isate-rippat tamatuma kingunerissavaa kommunalbestyrelsip taarsigassarsiarititaa akilerneqartussanngussasoq.

Nr. 4-mut

Taarsigassarsisoq illumi sanaqataaffiusumi inuussutissarsiummik ingerlatsinersaq kommunalbestyrelsi aalajangersimasumik naliliisussaavoq. Allatigut § 3, imm. 2-mut nassuiaatinut innersuussisoqarpoq.

Nr. 5-imut

Taarsigassarsisoq illumit sanaqataaffiusumit anippat aamma §§ 17-18 malillugit inatsisit malillugit attartortitisoqanngippat kommunalbestyrelsimit taarsigassarsiat sumiginnarneqassapput tamakkerlugillu akiligassanngussallutik.

Nr. 6-imut

Illup sanaqataaffiusup illersorneqarsinnaasumik aserfallatsaaliorneqarnerata taamaalilluni qularnaveeqqusiinerup atuunnerata qulakkeerneqarnissaanut kommunalbestyrelsi qularnaveeqqusiisutut pisinnaatitaaffigaa. Tamanna qulakkeerniarlugu illup sanaqataaffiusup iluani misissussallugu kommunalbestyrelsip periarfissaqarnissaa pisariaqarsinnaavoq. Matumani kommunalbestyrelsip eqqartuussisumit aalajangiisoqarsimatinnagu illumut sanaqataaffiusumut isersinnaanissaa pineqanngilaq, kisiannili taarsigassarsisup piviusorsiorlumik tunngavissaqarani kommunalbestyrelsi illumik sanaqataaffiusumik misissuiniarluni isernissaanut itigartippagu, kommunalbestyrelsimit taarsigassarsiat sumiginnarneqassapput tamakkerlugillu akiligassanngussallutik. Kommunalbestyrelsi nalinginnaasumik misissuinissaq aamma misissuinermi siunertaq pillugu siumoortumik nalunaaruteqartariaqarpoq.

Nr. 7-imut

Obligationinut inatsisini nalinginnaasuni maleruagassat naapertorlugit akiitsullit nikinnissaannut akiitsoqarfiusup akuersinissaa piumasarineqarpoq. Illumut taarsigassarsianik tiguisoqassappat, kommunalbestyrelsip akiitsoqarfiusutut akiitsullit nikinnissaannut akuersinerminik nalunaaruteqarnissaa piumasarineqarpoq. Tamanna nalinginnaasumik illumik sanaqataaffiusumik pisisup qularnaveeqqusiussaqluni taarsigassarsinerlut allagartami, § 15, imm. 3 naapertorlugu illumut nalunaarsorneqarsimasumi akiitsulittut inissinnissaanut kommunalbestyrelsip akuersineratigut pisassaaq. Sanaqateqarluni illuliamut taarsigassarsianut akiitsullit nikinnerannut kommunalbestyrelsi akuersimatinnagu, illu sanaqataaffiusoq piginnittumut tunniunneqarsimagaluarpalluunniit taarsigassarsisoq taarsigassarsianut akiitsulittut inissisimassaaq.

Illumik niueruteqarnerup iluoorneranut uppersarsaammut, tassungalu ilanngullugu piginnittuunermut uppersarsaatip nalunaarsorneqarneranut atatillugu piginnittut nikinnerat nalunaarutigineqarpat, taarsigassarsiat akiligassanngortinneqassanngillat.

Tunngaviusumik illumik sanaqataaffiusumik piginnittup nutaap, taarsigassarsianut akiitsullip nikinneranut kommunalbestyrelsi akuersimatinnagu, imaluunniit taarsigassarsiat akilerneqarsimatinnagit, illullu nalunaarsorsimajunnaarnissaa uppersarsarneqarsimatinnagu piginnittuunermut uppersarsaat inaarutaasoq eqqartuussivimmit nalunaarutitaqartinnagu nalunaarsortissinnaanngilaa. Aatsaat illumik sanaqataaffiusumik pissarsisup illuutini pillugu Kalaallit Nunaanni Eqqartuussivimmut nalunaarsuititsinnaatinnagu, taarsigassarsisup pissarsisullu kingusinnerpaamik Kalaallit Nunaanni Eqqartuussivimmut nalunaarsuititsinerminni kommunalbestyrelsimut qularnaveeqqusiussaqluni taarsigassarsinerlut, taamaalillunilu taarsigassarsisup taarsigassarsiaanut allagartaq maluginngitsoorsinnaavaat. Pigisamik aalaakkaasumik piginnissinnaatitaanerup piginnittullu nikinnerisa atuutilissagunik nalunaarsorneqartussaanerut inatsisitigut piumasaqaataannngimmat aalajangersagaq ilanngunneqarpoq.

Taarsigassarsiat akiligassanngortinneqassanersut naliliinermi pissutsinik utoqqatsissutaasinnaasunik, soorlu tassanngaannartumik napparsimalernermik, ajutoornermik imaluunniit piginnittut nikinnerat sioqqutitsiarlugu nalunaartoqarneranik peqarneraq eqqarsaatigineqassaaq. Assersuusiarineqartut tamakkiisuunngillat.

Aalajangersimasunut naliliinermi pissutsinik utoqqatsissutaasinnaasunik, taarsigassarsiat akiligassanngortinneqarnerinik kinguneqartussaannngitsunik peqarneraq apeqqutaassaaq. Taarsigassarsisup inatsisini maleruagassat imaanik ilisimasaqannginnera pingaarnertut pissutsit utoqqatsissutigineqarsinnaasutut isigineqarsinnaanngilaq, kisiannili pisut ilaanni tamanna naliliinermut ilaatinneqarsinnaavoq, soorlu taarsigassarsisoq tarnikkut sanngiillisimappat, assersuutigalugu innarluuteqarnerup napparsimanerulluunniit kingunerisaanik.

Sanaqataasooq piviusumik piginnittut nikinnerannik ingerlatsippat tamannalu kommunalbestyrelsimut nalunaarutigineqanngippat tamanna namminermi kommunalbestyrelsimut taarsigassarsianik sumiginnaaneruvoq tamakkerlugillu akiligassanngussallutik. Tamanna atuuppoq piginnittut nikinnerat §§ 20-22-mi malittarisassat malillugit pisimagaluarpalluunniit.

Nr. 8-mut

§§ 17-18-imi malittarisassat malillugit sanaqataasooq illu sanaqataaffiusooq attartortissinnaavaa. Attartortitsineq assersuutigalugu attartorneq pillugu isumaqatigiissummi kommunalbestyrelsimut akuerineqanngitsoq namminermi kommunalbestyrelsimut taarsigassarsianik sumiginnaaneruvoq tamakkerlugillu akiligassanngussallutik. Tamanna aamma atuuppoq attartorneq pillugu isumaqatigiissut kommunalbestyrelsimut akuerineqarsinnaasimagaluarpat.

Kommunalbestyrelsip akuerisaani attartorneq pillugu isumaqatigiissut qaangerlugu sanaqataasooq attartornermi akiliummik pissarsisimappat namminermi kommunalbestyrelsimut taarsigassarsianik sumiginnaaneruvoq tamakkerlugillu akiligassanngussallutik.

Imm. 2-mut

Kommunalbestyrelsimut taarsigassarsiat sumiginnarnerannik kinguneqartumik pissutsinik atuuttoqarpat pissutsit iluarsineqarnissaannut sanaqataasimasooq piffissamik kommunalbestyrelsimut nalunaarfigineqarsinnaavoq, kommunalbestyrelsip sumiginnaasooqarsimanera atuutsilernissaa pitinnagu taarsigassarsiallu akilerneqarnissaat piumasaaqatigalugu.

§ 24-mut

Imm. 1-imut



Taarsigassarsianik sumiginnaasoqarpat illu sanaqataaffiusoq tigusinnaallugu imaluunniit illu sanaqataaffiusoq pinngitsaaliinikkut akitsorterussinikkut tuniniarneqarnissaa piumasarlugu kommunalbestyrelsi aalajangiisinnavaoq. Kommunalbestyrelsip illup tigusissaa imaluunniit pinngitsaaliissummik tuniniarneqarnissaa pisussaaffiginngilaa. Tamanna kommunalbestyrelsimi aalajangersimasumik naliliinermik tunngaveqassaaq. Tamanna ilaatigut illup qanoq ittueneranik, sumiiffimmi inissianik pisariaqartitsinermik illumilu akisussaannermik tunngaveqassaaq.

Kommunalbestyrelsi illumik sanaqataaffiusumik tigusissappat, tamanna taarsigassarsisumut isumaqatigiissuteqarneq tunngavigalugu pissaaq. Pinngitsaaliinikkut tuniniaaneq Kalaallit Nunaanni eqqartuussisarneq pillugu inatsimmi tamanna pillugu malittarisassat tunngavigalugit pissaaq.

#### Imm. 2-mut

Aalajangersakkami kommunalbestyrelsip illu sanaqataaffiusoq tiguppagu, kommunalbestyrelsip taarsigassarsisullu akornanni aningaasaqarnikkut naatsorsugassat kommunalbestyrelsip suliarissagai aalajangersarneqarpoq.

#### Imm. 3-mut

Aalajangersakkami aalajangersarneqarpoq, illup tiguneqarnerani aningaasatigut isumannaagassat naatsorsorneqarnissaat illup sanaqataaffiusup niurutigineqarnerani nalinga, kommunalbestyrelsimut akiitsut sinnerinik ilanngarlugu tunngavigineqassasoq. Kommunalbestyrelsip pissarsiasarisinnaasai isumakkeerneqassapput. Illup sanaqataaffiusup niurnermi nalinga taarsigassarsisup akiitsuisa sinnerinit appasinnerugaluarpalluunniit, kommunalbestyrelsi illumik sanaqataaffiusumik tigusiniarluni akuersippat, taarsigassarsisup kommunalbestyrelsimut akiitsuisa sinneri peerneqassapput.

Kommunalbestyrelsip illu sanaqataaffiusoq tiguppagu, illu kommunalbestyrelsip inissiaataanut attartortittakkanut nalinginnaasunut ilanngunneqassaaq, taamatullu kommunalbestyrelsip illu qilorsorsimangitsumik niuruteqarnermi nalinginnaasumi tuniniarsinnaavaa. Kommunalbestyrelsip illu, § 24 naapertorlugu tiguneqarsimasoq kingusinnerusukkut tuniniarpagu, kommunalbestyrelsi illumut illutut sanaqataaffiusutut, tak. § 7, taarsigassarsititsisinnaanngilaq.

#### Imm. 4-mut

Kommunalbestyrelsip taarsigassarsisitsinera sioqqullugu aamma illumik sanaqataaffiusumik kommunip tigusineranut atasumik qularnaveeqqusiisimasoq qularnaveeqqusiinermut akerlilippat illumi sanaqataaffiusumi qularnaveeqqusiineq salliuffiusoq nalunaarsorneqarsimappat kommunalbestyrelsi illumik sanaqataaffiusumik tigusinnaanngilaq.

#### § 25-mut

Imm. 1-imut

Siunnersuutigineqarpoq illumik sanaqataaffiusumik pissarsinermut taarsigassarsinermut atatillugu akiliummik akileeqqusinissamut kommunalbestyrelsi piginnaatitaassasoq.

Aalajangersagaq piginnaatitsissutitut ilusilerneqarpoq kisianni akiliummik akileeqqusinissamut pisussaaffilernagu. Politikkikkut pingaarnersiunerminut aamma nalinginnaasumik allaffissornikkut suleriaaseqarnermut atasumik akiliummik akiliisoqannginnissaa imaluunniit akiliummik annikitsumik akiliisoqarnissaa kommunalbestyrelsi aalajangiisinnaavoq.

Akiliut kommunalbestyrelsimit aalajangersarneqassaaq, taannalu kommunalbestyrelsip suliamik suliaqarneranut, tassungalu ilanngullugu qinnuteqaatip immersorneqarneranut atatillugu ilitsersuineranut, paasissutissanik pissarsinermut pissarsiniarnermullu, aalajangiinerup tamatumalu kingorna qularnaveeqqusiussaqluni taarsigassarsinermut allagartamik nakkutilliineranut matussutigineqassaaq. Taagorneqartut tamakkiisuunngillat.

Kommunalbestyrelsip taarsigassarsiarititaasa 0,5 %-ii annerpaaffissatut killiliunneqarput. Akiliut kommunalbestyrelsip suliamik suliaqarnerani, tamatumalu kingorna Inatsisartut inatsisaat manna naapertorlugu misissuinerani aningaasartuutiviusut agguaqatigiissinnerisigut illuatungilerneqassaaq.

Imm. 2-mut

Akiliummik akileeqqusiisoqassasoq kommunalbestyrelsi aalajangiippat taarsigassarsinissamut neriorsuineq nalunaarutigineqarpat akiliut akilerneqassaaq.

#### *§ 26-mut*

Imm. 1-imut

Siunnersuutigineqarpoq piginnittut nikinnerini qularnaveeqqusiussaqluni taarsigassarsisitsinermi allagartamik atsiornermut atatillugu akiliummik akileeqqusinissamut kommunalbestyrelsi piginnaatinneqassasoq, tak. siunnersuummi §§ 20-21.

Aalajangersagaq piginnaatitsissutitut ilusilerneqarpoq kisianni akiliummik akileeqqusinissamut pisussaaffilernagu. Politikkikkut pingaarnersiunerminut aamma nalinginnaasumik allaffissornikkut suleriaaseqarnermut atasumik akiliummik akiliisoqannginnissaa imaluunniit akiliummik annikitsumik akiliisoqarnissaa kommunalbestyrelsi aalajangiisinnaavoq.

Akiliut kommunalbestyrelsimit aalajangersarneqartassaaq, taannalu kommunalbestyrelsip akiitsullit nikinnerannut akuersinermi qularnaveeqqusiissuteqarlunilu taarsigassarsinermut uppernarsaammik atsiornerminut atatillugu suliaqarneranut matussutaassaaq.

1.250 kr.-inut killiliussaq annerpaaffiuvoq. Akiliut kommunalbestyrelsip suliamik suliagarnerani, qularnaveeqqusiissuteqarluni taarsigassarsinermut allagartanik atsiornani tamatumalu kingorna akiitsullit nikinnerisa illuummut nalunaarsorsimaneranik misissuinerani aningaasartuutiviusut agguaqatigiissinnerisigut illuatungilerneqassaaq.

Imm. 2-mut

Aalajangersakkami akiitsullit nikinnerinut, tak. § 12, imm. 2, atatillugu kommunalbestyrelsip nammineq sinnerluni qularnaveeqqusiissuteqarluni taarsigassarsinermut allagartanut atsiorsinnaaneq kiisalu imm. 1 naapertorlugu akiliutinik akiliisitsisinnaaneq pillugu kommunalbestyrelsip aningaaserivimmuut ataatsimut amerlanerusunulluunniit piginnaatitsissummik nalunaaruteqarsinnaanissaa aalajangersarneqarpoq.

#### § 27-mut

Imm. 1-imut

Aalajangersagaq kommunalbestyrelsip Inatsisartut inatsisaat manna naapertorlugu aqutsinermik inissiatileqatigiiffimmuut kommunimit imaluunniit Namminersorlutik Oqartussanit pigineqartumut suliakkiisinnaaneranut inatsisitigut tunngavissamik aalajangersimasumik imaqarpoq. Piginnaatitsissut annertuujuvoq, taamaalillunilu kommunalbestyrelsip oqartussaasuuneq ingerlatseqatigiiffimmuut inissianik aqutsisumut, namminersortunut inatsisit tunngavigalugit pilersinneqartumut, niuernikkut kommunalbestyrelsip tungaanut attuumassuteqanngitsumut suliakkiissutigisinnaavaa.

Imm. 2-mut aamma 3-mut

Aalajangersakkami kommunalbestyrelsip suliakkiinini pisussaaffittut suliakkiissutigisinnaagaa, kiisalu kommunalbestyrelsi inatsisip matuma aqunneqarneranut atatillugu ingerlatseqatigiiffimmuut aqutsisuusumut ilitsersuisinnaatitaassaq, taamaalillunilu namminersortumut piginnaatitsissummik isumaginninneranut kommunalbestyrelsip tamatigut ilitsersuisinnaanissaa misissuisinnaanissalu aalajangersarneqarpoq.

Isumaqatigiissuteqarnikkut inatsisartut inatsisaat manna naapertorlugu aqutsinermut akiliuteqartoqartassaaq.

#### § 28-mut

Imm. 1-imut

Qinnuteqaat kommunalbestyrelsimut nassiunneqassaaq. Qinnuteqaat tassungalu ilanngussaq allaganngorlugit nassiunneqassapput. Qinnuteqaat aamma allakkasuaatikkut imaluunniit mailitit allagaatit scannerlugit nassiunneqarsinnaavoq. Allagaanissaanut piunasaqaatip paasisutissat allagaatillu attuumassuteqartut kommunalbestyrelsimit tiguneqarnissaat qulakkeerpaa.

#### Imm. 2-mut

Taarsigassarsinissamut qinnuteqaammut ilanngunneqassaaq illup sanaqataaffiusussatut kisaatigineqartumut allaaserinninneq. Taarsigassarsinissamut qinnuteqaammut aamma ilanngunneqassaaq nunaminertamik kommunalbestyrelsimut qinnuteqaatip assilinera. Aammattaaq qinnuteqaammut ilanngunneqassaaq nammineq aningaasalersuinissap pissarsiarineqarsimaneranut uppersaasat kiisalu pilersaarutaasumik piffissakkaartumik aserfallatsaaliinissamut aningaasartuutit taarsigassarsisumit akilerneqarsinnaasut. Nammineq aningaasalersuinissamut uppersaasat tassaasinnavaoq taarsigassarsisup aningaaserivianiit nalunaarut naatsoq, tassani allasimalluni taarsigassarsiniartoq aningaasalersuinissaminut periarfissaqartoq kiisalu aserfallatsaaliinissamut aningaasartuutitik akiliisinnaassasoq. Piffissakkaartumik aserfallatsaaliinissamut aningaasartuutit attuumassuteqartumut pilersaarummi atortussat aamma illup sanaqataaffiusussap typeanik akuersineq allaaserineqarsimassapput.

Kiisalu qinnuteqaammut ilanngunneqassapput qinnuteqartup cpr.normua najugaqarnermullu uppersaasataa, qinnuteqartup kinaassusianik erseqqissaasoq taassumalu inuit nalunaarsorsimaffiani najugaata nalunaarsorsimanera.

#### § 29-mut

#### Imm. 1-imut

Qinnuteqartup pisortanut akiitsoqarnera pillugu Akiliisitsiniarnermut oqartussamut imaluunniit qinnuteqartup attartortitsisumut akiitsoqarnera pillugu inissianik attartortittakkanik aqutsisumut oqaaseqaammik piniarnissamut, qinnuteqartup kommunalbestyrelsimut akuersissuteqarnissaa, qinnuteqaatip suliarineqarnissaanut piimasaqaataavoq.

Qinnuteqartup kommunalbestyrelsimut imaluunniit allaffissornikkut aqutsisumut akuersissummik tunniussinerani, kommunalbestyrelsip imaluunniit allaffissornikkut aqutsisup inuit pillugit paasissutissanut maleruagassanut naapertuuttumik paasissutissanik piniarnissaa qulakkeerneqassaaq.

#### Imm. 2-mut

Taarsigassarsinissamik qinnuteqartoqarnerani kommunalbestyrelsi qinnuteqartup pisortanut akiitsoqarnera pillugu oqaaseqaammik Akiliisitsiniartarnermi Oqartussaasunut pissarsiniassaaq. Qinnuteqartoq pisortat inissiaataanni attartortittakkami attartortuuppat, aamma inissiamik attartortittakkamik aqutsisumut qinnuteqartup attartortitsisumut akiitsoqarnera pillugu oqaaseqaammik pissarsiniartoqassaaq. Tamatumani qinnuteqartup pisortanut akiitsuinik eqqortumik naatsorsuinissaaq qulakkeerneqassaaq. Pisortat inissiaataanni attartortittakkani ineqarnermut akiligassat akilinngitsuukkat Akiliisitsiniartarnermi Oqartussaasunut nalunaaruteqarnermi piffissaaq nikingasinnavaoq.

Akiliisitsiniartarnermi Oqartussaasut aamma aqutsisoq pisortanut akiitsut akilerneqanngitsut pillugit ilisimatitsinissamut pisussaaffeqarput.

Imm. 3-mut

Qinnuteqartup pisortanut akiitsui suli akilerneqanngitsut 25.000 kr.-it sinnersimappagit taarsigassarsinissamut neriorsuummik nalunaaruteqartoqarsinnaanngilaq. Taamaalilluni kommunalbestyrelsip qinnuteqartunut pisortanut akilerneqanngitsunik akiitsulinnut taarsigassarsititsinissamut akuersisinnaannginnera pingaartinneqarpoq.

Taarsigassarsititsisoqarsinnaassappat taarsigassarsinissamik qinnuteqartup pisortanut akiitsuni annikillisititariaqassavai.

### § 30-mut

Imm. 1-imut

Illumik sanaqataaffiusumik sanaartornissamut imaluunniit pissarsinissamut taarsigassarsiasat pillugit qinnuteqaat kommunalbestyrelsinut ataasiakkaanut nassiuunneqarlunilu taakkunani suliarineqassaaq. Kommunalbestyrelsi taannaavoq illunut sanaqataaffiusunut aningaasanik ataatsimoortumik pingaarnersiuisoq aamma sumi qanorlu amerlatigisumik illunik sanaqataaffiusunut sanaartortoqassanersoq aalajangiisartoq.

Imm. 2-mut

Kommunalbestyrelsi taannaavoq illumik sanaqataaffiusumik sanaartornissamut taarsigassarsiasanik akuersisartoq. Illup sanaqataaffiusup sanaartornissaanut taarsigassarsiat taarsigassarsisumut akilerneqassanngillat. Illuliassatut katitigassanik iniminniinermik aamma illup sanaqataaffiusup sanaartornerani atugassanik sanasunik ilitsersuisumillu isumaqatigiissusiornissamik aamma taarsigassarsinissamut neriorsuummi sinaakkusiussat iluanni akiliinerit isumaginissaannut kommunalbestyrelsi isumaginnissaaq.

Taamaalilluni kommunalbestyrelsi, qinnuteqartoq suleqatigalugu, illumik sanaqataaffiusumik sanaartornermut atasumik suliassamik suliarinninnernik annertuunik isumaginnittuuvoq. Tamanna Namminersorlutik Oqartussat manna tikillugu aqutsinermik isumaginninneranik allaanerunngilaq. Taanna § 15, imm. 3-mut atasutut isigineqassaaq, taannalu malillugu taarsigassarsisumut atuilernissamut akuersinerup nalunaarutiginiisaata aamma kommunalbestyrelsip taarsigassarsisitsineranut isumannaarutitut kommunalbestyrelsimut qularnaveeqqusiussaqarluni taarsigassarsinermut allagartap nalunaarsornissaata tungaanut illu sanaqataaffiusoq kommunalbestyrelsimit pigineqarpoq.

Tamanna aammattaaq § 33-mut atatillugu isigineqassaaq taanna naapertorlugu illuliassatut katitigassanik pilersuisumut kiisalu sanasunut il.il. peqataasunut kommunalbestyrelsimut taarsigassarsiat akilerneqassallutik. Kommunalbestyrelsip taarsigassarsiarititai arlaannaaluunniit taamaalilluni sanaqataasumut tunniunneqassanngillat.

Imm. 3-mut

Suliamik suliarinninnermut atasumik ikuallattoornissamut illullu sillimmasersornissaanut neqeroorummik kommunalbestyrelsi pissarsiniassaaq. Kommunalbestyrelsip neqeroorut, qinnuteqartup sillimmasiissummut akiligassamut akiliinissaa siunertaralugu qinnuteqartumut nassiutissavaa. Qinnuteqartoq aamma nammineepluni ikuallattoornissamut illumullu sillimmasiissummut neqerooruteqartitsisinnaavoq. Qinnuteqartup taarsigassarsiat tunniunneqartinnagit ikuallattoornissamut illumullu sillimmasiissummut akiliisimanermit uppersarsaat nassiutissavaa, tak. § 34.

### *§ 31-mut*

Sanaartornermi aningaasartuutit taarsigassarsiffiusinnaasut tamarmiusut missiliornerinik kii-salu illumut sanaqataaffiusumut ingerlatsinermit missingersuutinik kommunalbestyrelsi suliaqassaaq. Sanaartornermi aningaasartuutit taarsigassarsiffiusinnaasut tamarmiusut missiliorneri kommunalbestyrelsip taarsigassarsiaasaanik qinnuteqartullu nammineq akiliuteqarnissaanik naatsorsuinnermit tunngavigineqassapput.

Illup sanaqataaffiusup aserfallatsaaliornissaa pillugu ingerlatsinermit missingersuutit illup sanaqataaffiusup aserfallatsaaliornissaanut pisariaqartunik qinnuteqartup ileqqaarsinnaaneranik nalilersuinissamut qinnuteqartumut taassumalu aningaaserivianut tunngavissiiuvoq.

### *§ 32-mut*

Kommunalbestyrelsi missingersuusiamik ingerlatsinermullu missingersuummik qinnuteqartumut saqqummiussissaaq. Qinnuteqartoq missingersuusianut ingerlatsinermilu missingersuusianut akuersisinnaappat kommunalbestyrelsi taarsigassarsinissamut neriorsuummik nalunaaruteqassaaq. Taarsigassarsinissamut neriorsuummut apeqqutaassaaq qinnuteqartup nammineq aningaasalersuisinnaaneranut qinnuteqartup qularnaveeqqusiisinaanera.

### *§ 33-mut*

Imm. 1-imut

Illumik sanaqataaffiusumik sanaartornermit imaluunniit pissarsinnermit taarsigassarsianik qinnuteqaat kommunalbestyrelsinut ataasiakkaanut nassiunneqassapput tassanilu suliarineqassallutik. Kommunalbestyrelsi taannaavoq illumut sanaqataaffiusunut aningaasanik ataatsimoortumik pingaarnersiuisoq aamma sumi qanorlu amerlatigisumik illumik sanaqataaffiusunut sanaartortoqassanersoq aalajangiisartuq.

Imm. 2-mut

Illunut sanaqataaffiusunut sananissamut pissarsinissamullu taarsigassarsiat taarsigassarsisumut akilerneqartassanngitsut aalajangersakkami aalajangersarneqarpoq. Illuliassat katitigassanik iniminniinermik aamma illup sanaqataaffiusup sanaartornerani atugassanik sanasunik ilitsersuisumillu isumaqatigiissusiornissamik aamma taarsigassarsinissamut neriorsuummi sinaakkusiussat iluanni akiliinerit isumaginissaannut kommunalbestyrelsi isumaginnissaaq.

#### Imm. 3-mut

Aalajangersakkami taarsigassarsianut akiliisarnermut maleruagassanik sukumiisunik, taakkunungalumaleruagassanik imm. 1-imik aamma 2-mik atuutsitsiviunngitsunik aalajangersaanissamut Naalakkersuisut piginnaatinneqarput. Assersuutigalugu sanasunut ilitsersuisunullu akiliisarnermut maleruagassat Illuliortiternermi Sanaartornermilu suliassanut pilersuinernullu ataatsimut piumasaqaatit (AP95), suliassanut immikkoortunut, angisuunut imaluunniit pingaarnernut atuuttut, imaluunniit Suliassanut tamarmiusunut piumasaqaatit nalinginnaasut (ABT 93), tamanik suliqaarnermut atuuttut tunngavigalugit aalajangersarneqarsinnaapput.

#### § 34-mut

Illu sanaqataaffiusoq qaqugukkulluunniit ikuallattoornissamut illullu ajoqusersinnaaneraniq sillimmaserneqarsimassaaq. Sillimmasiineq illuliassat katitigassat pilersuisumiit tunniunneqarnerannit atuutilersimassaaq. Pissutsit naapertorlugit illu sanaqataaffiusoq kommunip nammineq sillimmasiineranut ilaatinneqarnissaa kommunalbestyrelsip toqqarsinnaavaa piginnittussaanerup sanaqataasumut tunniunneqarnissaata tungaanut, tak. § 15, imm. 3.

Sillimmasiisarfik aalajangersakkap atunernerani sillimmasiissummut akiligassap akilerneqarsimannginnera pillugu kommunalbestyrelsimut nalunaaruteqarnissamut periarfissaqarpoq, kisianni tamatumunnga pisussaaffeqarani.

#### § 35-mut

#### Imm. 1-imut

Siunnersuutigineqarpoq illu sanaqataaffiusoq sanariikkatut katitigassatut assigiaartunik Naalakkersuisunit akuerineqassasoq. Tamatuma illut sanaqataaffiusut ilaatigut pitsaassuseqarnissaat aamma nunaqarfinni illoqarfinnilu mikinerusuni sanaartornissamut tulluartaunissaat qulakkiissavaa. Aamma illut sanaqataaffiusut tulluartaunik sananeqartarnissaat taamaalillutillu sanaqataasup illuliassanik passussisinnaanera illumillu sanaartornermi peqataasinnaanera qulakkiissavaa.

Sanariikkatut katitigassatut assigiaartunik akuersinermi atortunik aserfallatsaalisariaqanngitsunik sapinngisamik annertunerpaamik imaluunniit atortunik

ingerlaavartumik aserfallatsaaliorneqarnissamik annikillisaasunik atuinissaq pingaartinneqassaaq.

Illuliassamut katitigassamut aamma ilaavoq nalinginnaasumik kiassarnermik pilersuineq kissarsuut uuliartortoq. Illumik sanariikkanik katitigassanik pissuseqatigiimmik akuersinermut atatillugu aamma nukissiuutit allat imaluunniit ilassutaasut assersuutigalugu seqerngup qinngorneranik tigooraassutit kiassarnermilu pumpit aamma akuerineqarsinnaapput. Teknikkikkut aalajangersimasumik aaqqiineq naammattumik uppersarneqarsimaneranik, misiligarsimaneranik ingerlanneranilu isumannaatsuuneranik aalajangersimasumik naliliinermut tamanna tungaveqassaaq. Taakku saniatigut teknikkikkut aaqqiineq aalajangersimasoq sumiiffinni ataasiakkaani kiffartuussiffiusinnaanersoq pillugu sanariikkatut katitigassatut suussusissanik akuersinermut pingaaruteqassaaq.

Illup sanaqataaffiusup sanariikkatut katitigassatut assigiaartunik Naalakkersuisut akuersisarput, taanna ukiut ataasiakkaarlugit atuuttarluni. Sanariikkatut katitigassatut assigiaartunik akuersineq pillugu kommunimi sanaartornermut oqartussanut allakkatigut Ineqarnermut Naalakkersuisoqarfik ilisimatitsisarpog. Assersuutigalugu illu sanaqataaffiusoq pillugu pilersaarummik kommunalbestyrelsi imaluunniit illuni sanaartortartoq suliarsinnaavoq taannalu Naalakkersuisuni sanariikkanik katitigassanik pissuseqatigiittut akuerineqarnissaa nassiullugu. Tamanna sumiiffinnut tulluarsarneqartunik illunut sanaqataaffiusunut iluaqutaasinnaavoq.

Sanaartornissamut akuersineq nalinginnaasumik sanaartornerni ataasiakkaani tamani pissarsiariniarneqartarpoq, kisiannili sanariikkatut katitigassatut assigiaartunik akuersinerup malitsigisaanik kommunip sanaartorneq pillugu suliassanik suliarinninnera pisariinnerulersissavaa. Illumik sanaqataanermut suliniummi akisussaasup, pisussaaffigaa sanariikkatut katitigassatut assigiaartut akuersissutip naammassineqarnissaa siunertaralugu suliniummi atortut naatsorsuinerillu tulluurtumik iluarsineqarsimasut Ineqarnermut Naalakkersuisoqarfimmut nassiunneqartussaapput. Sanariikkanik katitigassanik assigiaanik akuersineq, ukiumut ataatsimut atuuttoq, qinnuteqartoqarneratigut sivitsorneqarsinnaavoq. Sanariikkanik katitigassanik assigiaanik akuersinerup nutaap atulersinnissaa siunertaralugu suliniummi atortut pisariaqartumik nutarterneqarnissaasa isumaginissaat suliniummi akisussaasup pisussaaffigai.

Imm. 2-mut

Illumik sanariikkanik katitigassanik assigiaartunik akuersisoqarnissaa pillugu qinnuteqaammut atasumik qinnuteqartoq illup pilersaarutaasumik piffissakkaartumillu aserfallatsaaliinissamut pilersaarummik nassiussissaaq aserfallatsaaliinermilu sulianut ataasiakkaanut aningaasartuutissatut missingiussat allallugit. Pilersaarutaasumik piffissakkaartumillu aserfallatsaaliinissamut pilersaarummi ukiumut siullerni 20-ni pilersaarutaasumik piffissakkaartumillu aserfallatsaaliinermut ukiumut aningaasartuutissatut missingiussat naatsorsussavaa.



*§ 36-mut*

Siunnersuutigineqarpoq inatsisartut inatsisaat ulloq 1. januar 2019-imi atuutilissasoq.